



An Bhruiséil, 5 Samhain 2024
(OR. en)

15159/24

**Comhad Idirinstitiúideach:
2022/0407(CNS)**

**FISC 213
ECOFIN 1235**

TORADH NA nIMEACHTAÍ

ó: Ardrúnaíocht na Comhairle

chuig: na toscaireachtaí

Uimh. an doic. 14961/24

roimhe seo:

Ábhar: Dréacht-Treoir ón gComhairle lena leasaítear Treoir 2006/112/CE a mhéid a bhaineann le rialacha CBL don ré dhigiteach
- Cur chuige ghinearálta

Gheobhaidh na toscaireachtaí i gceangal leis seo téacs an chur chuige ghinearálta maidir leis an dréacht-Treoir thuasluaite ar thángthas air ag cruinniú den Chomhairle (Gnóthaí Eacnamaíocha agus Airgeadais) an 5 Samhain 2024.

2022/0407 (CNS)

Dréacht

TREOIR ÓN gCOMHAIRLE

lena leasaítear Treoir 2006/112/CE a mhéid a bhaineann le rialacha CBL don ré dhigiteach

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 113 de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Pharlaimint na hEorpa¹,

Ag féachaint don tuairim ó Choiste Eacnamaíoch agus Sóisialta na hEorpa²,

Ag gníomhú di i gcomhréir le nós imeachta reachtach speisialta,

¹ IO C , , lch. .

² IO C , , lch. .

De bharr an mhéid seo a leanas:

- (1) Tá tionchar suntasach ag teacht chun cinn an gheilleagair dhigitigh ar fheidhmiú chóras CBL an Aontais, toisc nach bhfuil sé oiriúnach do na samhlacha nua gnó dhigitigh, agus ní cheadaíonn sé úsáid iomlán a bhaint as na sonraí a ghintear leis an digiteáil. Ba cheart Treoir 2006/112/CE³ ón gComhairle a leasú chun an fhorbairt sin a chur san áireamh.
- (2) Ba cheart na hoibleagáidí tuairiscithe CBL a oiriúnú chun aghaidh a thabhairt ar na dúshláin a bhaineann leis an ngeilleagar ardán agus chun an gá atá le clárúcháin iolracha CBL san Aontas a laghdú.
- (3) Measadh gurbh ionann cailteanas ioncaim CBL, ar a dtugtar ‘an Bhearna CBL’, agus EUR 93 bhiliún⁴ san Aontas in 2020, agus bhí calaois ina cuid shuntasach den mhéid sin, go háirithe calaois laistigh den Chomhphobal arna déanamh ag trádálaí ar iarraidh⁵, a measadh a bheith sa raon idir EUR 40 billiún agus EUR 60 billiún⁶. I dtuarascáil chríochnaitheach na Comhdhála ar Thodhchaí na hEorpa, éilíonn saoránaigh ‘Comhchuibhiú agus comhordú beartas cánach laistigh de Bhallstáit an Aontais chun imghabháil agus seachaint cánach a chosc’, agus ‘An comhar a chur chun cinn idir Ballstáit an Aontais chun a áirithiú go n-íocann gach cuideachta san Aontas sciar chothrom den cháin’. Tá an tionscnamh CBL sa Ré Dhigiteach i gcomhréir leis na spriocanna sin.

³ Treoir 2006/112/CE ón gComhairle an 28 Samhain 2006 maidir leis an gcóras comhchoiteann cánach breisluacha (IO L 347, 11.12.2006, lch. 1).

⁴ Is éard atá sa Bhearna CBL an difríocht fhoriomlán idir an t-ioncam CBL a bhfuil coinne leis bunaithe ar reachtaíocht CBL agus rialacháin choimhdeacha agus an méid a bhailítear go hiarbhir:

https://ec.europa.eu/taxation_customs/business/vat/vat-gap_en

⁵ Europol: <https://www.europol.europa.eu/crime-areas-and-statistics/crime-areas/economic-crime/mtic-missing-trader-intra-community-fraud>

⁶ Cúirt Iniúchóirí na hEorpa:

https://www.eca.europa.eu/Lists/ECADocuments/SR15_24/SR_VAT_FRAUD_EN.pdf

- (4) Chun bailiú cánach ar idirbhearta trasteorann a mhéadú agus chun deireadh a chur leis an ilroinnt atá ann faoi láthair a eascraíonn as cur chun feidhme córais tuairiscithe éagsúla i measc na mBallstát, ba cheart rialacha a leagan síos maidir le ceanglais tuairiscithe dhigitigh san Aontas. Leis na rialacha sin, ba cheart faisnéis a sholáthar do riaracháin chánach ar bhonn gach idirbhirt, chun crosmheaitseáil sonraí a cheadú, chun cumais rialaithe na riarachán cánach a mhéadú agus chun éifeacht dhíspreagthach ar neamhchomhlíonadh a chruthú, agus ag an am céanna costais chomhlíontachta a laghdú do ghnólachtaí a oibríonn i mBallstáit éagsúla agus deireadh a chur le bacainní laistigh den mhargadh inmheánach.
- (5) Chun uathobriú an phróisis tuairiscithe a éascú do dhaoine inchánacha agus do riaracháin chánach araon, ba cheart na hidirbhearta atá le tuairisciú do na riaracháin chánach a dhoiciméadú go leictreonach. Ba cheart an ríomhshonrascadh a bheith ina chóras réamhshocraithe chun sonraisc a eisiúint. Mar sin féin, ba cheart do na Ballstáit a bheith in ann sonraisc eile a údarú le haghaidh soláthairtí intíre.
- (5a) Chun an idir-inoibritheacht a uasmhéadú, ba cheart, i bprionsabal, go gcomhlíonfadh ríomhshonraisc an caighdeán Eorpach a leagtar síos i gCinneadh Cur Chun Feidhme (AE) 2017/1870 ón gCoimisiún⁷, lena gcomhlíontar an iarraidh a leagtar síos in Airteagal 3(1) de Threoir 2014/55/AE maidir le caighdeán Eorpach a chruthú le haghaidh shamhail sonraí séimeantacha na bpríomhghnéithe a bhíonn i ríomhshonrasc. Mar sin féin, féadfaidh na Ballstáit caighdeáin eile a cheadú fós le haghaidh soláthairtí intíre.

⁷ Cinneadh Cur Chun Feidhme (AE) 2017/1870 ón gCoimisiún an 16 Deireadh Fómhair 2017 maidir le foilsiú na tagartha don chaighdeán Eorpach i ndáil le ríomhshonrascadh agus liosta a chomhréireanna de bhun Threoir 2014/55/AE ó Pharlaimint na hEorpa agus ón gComhairle (IO L 266, 17.10.2017, lch. 19).

- (5b) Ba cheart do na Ballstáit atá inniúil chun na rialacha sonraiscithe a leagan síos bearta a dhéanamh, lena bhféadfaí a áireamh, mar shampla, scéimeanna creidiúnaithe, chun a áirithiú go gcomhlíonann ríomhshonraisc arna n-eisiúint ag daoine inchánacha comhréir theicniúil agus séimeantaic na gcaighdeán ceadaithe agus go bhfuil na sonraí uile is gá arna gcinneadh leis an riail sin iontu. Féadfar na bearta sin a dhéanamh maidir le daoine inchánacha ar gá dóibh an sonrasc a eisiúint nó maidir le soláthraithe seirbhísí tríú páirtí, nó maidir leis an dá ghrúpa sin. Is iad na daoine a ndíreofar na bearta sin orthu a bheidh freagrach as na bearta sin a chur i bhfeidhm. Mar sin féin, níor cheart go gcuirfeadh na bearta sin cosc ar dhaoine inchánacha na modhanna a roghnú chun a sonraisc a eisiúint agus a sheoladh chuig a gcustaiméir, is é sin go díreach iad féin, nó le hidirghabháil tríú páirtithe nó, má tá sé ar fáil, trí ardán poiblí.
- (5c) Chuirfí éifeachtacht na gcóras náisiúnta tuairiscithe dhigitigh i mbaol mura gcomhlíonfadh daoine inchánacha an oibleagáid maidir le ríomhshonraisc a eisiúint i ndáil leis na hidirbhearta atá faoi réir oibleagáid tuairiscithe. I bhfianaise dhigiteáil na n-idirbheart agus na malartuithe eacnamaíocha, agus i bhfianaise chuspóirí na Treorach seo maidir le CBL a dhigiteáil, lena n-áirítear d'fhonn comhrac níos éifeachtaí in aghaidh na calaoise a áirithiú, ba cheart cead a bheith ag na Ballstáit foráil a dhéanamh gur coinníoll substainteach a bheidh i sealbhú ríomhshonraisc arna eisiúint i gcomhréir leis an gcaighdeán riachtanach a leagtar síos sa Treoir maidir le CBL chun bheith i dteideal an CBL atá dlite nó íoctha a asbhaint nó a aiséileamh.

- (6) Ba cheart an sainmhíniú ar ríomhshonrasc a ailíniú leis an sainmhíniú a úsáidtear i dTreoir 2014/55/AE ó Pharlaimint na hEorpa agus ón gComhairle⁸, chun caighdeánú a bhaint amach i réimse an tuairiscithe CBL. Mar thoradh air sin, ní chumhdófar leis an sainmhíniú ar ríomhshonrasc ach ríomhshonraisc a eiseofar, a tharchuirfear agus a phróiseálfar i bhformáid struchtúrtha leictreonach lena gceadaítear próiseáil uathoibríoch nó leictreonach. Leis an oibleagáid maidir le formáid struchtúrtha a úsáid, ba cheart go gcumhdófaí, ar a laghad, na sonraí atá le tuairisciú. Dá bhrí sin, na sonraisc hibrideacha lena gcomhcheanglaítear sonraí atá leabaithe i bhformáid struchtúrtha agus sonraí atá leabaithe i bhformáid neamhstruchtúrtha atá inléite ag an duine, ba cheart iad a chumhdach leis an sainmhíniú sin má áirítear leis na sonraisc sin na sonraí go léir atá le tuairisciú i bhformáid struchtúrtha.
- (7) Chun an córas tuairiscithe CBL a chur chun feidhme ar bhealach éifeachtach, is gá go sroichfidh an fhaisnéis an riarachán cánach gan mhoill. Dá bhrí sin, ba cheart an sprioc-am chun sonrasc a eisiúint le haghaidh idirbhearta trasteorann a shocrú ag 10 lá tar éis don teagmhas inmhuirir tarlú.
- (8) Leis an ríomhshonrasc, ba cheart tarchur uathoibríthe na sonraí is gá chuig an riarachán cánach chun críocha rialaithe a éascú. Chun na críche sin, ba cheart na sonraí uile nach mór a tharchur chuig an riarachán cánach faoi na ceanglais tuairiscithe dhigitigh a bheith sa ríomhshonrasc i bhformáid struchtúrtha.

⁸ Treoir 2014/55/AE ó Pharlaimint na hEorpa agus ón gComhairle an 16 Aibreán 2014 maidir le ríomhshonrascadh i gcás an tsoláthair phoiblí (IO L 133, 6.5.2014, lch. 1).

- (9) Ní fhéadfaí an ríomhshonrasc a chur chun feidhme mar an modh réamhshocraithe chun idirbhearta a dhoiciméadú chun críocha CBL má fhanann úsáid an ríomhshonrais faoi réir a ghlactha ag an bhfaighteoir, go háirithe i gcomhthéacs B2B. Dá bhrí sin, i gcás sonrasc a eisítear do dhaoine inchánacha agus do dhaoine dlítheanacha neamh-inchánacha, níor cheart an glacadh sin a cheangal a thuilleadh chun ríomhshonrais a chomhlíonann an caighdeán Eorpach a eisiúint, ach amháin má bhain Ballstát úsáid as an rogha sonrais pháipéir nó sonrais i bhformáidí leictreonacha nach ríomhshonrais iad a cheadú. I gcásanna ina gceadóidh Ballstát caighdeáin eile a úsáid le haghaidh soláthairtí earraí nó seirbhísí laistigh dá chríoch, féadfaidh an Ballstát sin a chinneadh nach gá don fhaighteoir sonrais arna n-eisiúint de réir na gcaighdeán sin a ghlacadh. Nuair a eisítear ríomhshonrais do dhaoine eile, féadfaidh siad leanúint de bheith faoi réir a nglactha ag an bhfaighteoir.
- (10) Chomhlíon an Coimisiún a oibleagáid maidir le tuarascáil a chur i láthair Pharlaimint na hEorpa agus na Comhairle i ndáil le tionchar na rialacha sonraisithe is infheidhme ón 1 Eanáir 2013 agus go háirithe ar a mhéid atá laghdú ann anois ar ualaí riaracháin do ghnólachtaí dá bharr, mar a éilítear le hAirteagal 237 de Threoir 2006/112/CE. Ós rud é gur comhlíonadh an oibleagáid sin cheana féin, ba cheart í a bhaint den Treoir sin.
- (11) Ba cheart deireadh a chur leis an oibleagáid maidir le ráitis achoimreacha a chur isteach chun tuairisciú a dhéanamh ar idirbhearta laistigh den Chomhphobal, toisc go gcumhdaítear na hidirbhearta sin faoi raon feidhme na gceanglas tuairiscithe dhigitigh le haghaidh soláthairtí trasteorann earraí agus seirbhísí, ach le faisnéis atá níos tapúla agus níos mionsonraithe.
- (12) Chun tarchur na sonraí sonrais chuig an riarachán cánach a éascú do dhaoine inchánacha, ba cheart do na Ballstáit na modhanna is gá chun an tarchur sin a dhéanamh a chur ar fáil do na daoine inchánacha, rud a cheadódh gurb é an duine inchánach a sheolann na sonraí go díreach nó gur tríú páirtí a dhéanann iad a sheoladh thar ceann an duine inchánach sin nó trí thairseach phoiblí, má tá sé ar fáil.

- (13) Cé gur cheart an fhaisnéis atá le tarchur trí na ceanglais tuairiscithe dhigitigh le haghaidh soláthairtí trasteorann earraí agus seirbhísí a bheith cosúil leis an méid a tarchuireadh trí na ráitis achoimreacha, is gá iarraidh ar dhaoine inchánacha sonraí breise a sholáthar, lena n-áirítear sonraí bainc, chun gur féidir le riaracháin chánach ní hamháin na hearraí ach na sreabha airgeadais a leanúint freisin.
- (14) Ualach riaracháin gan ghá a chur ar dhaoine inchánacha a oibríonn i mBallstáit éagsúla, ba cheart é a sheachaint. Dá bhrí sin, ba cheart go mbeadh na daoine inchánacha sin in ann an fhaisnéis is gá a sholáthar dá riaracháin chánach trí úsáid a bhaint as an gcaighdeán Eorpach. Ba cheart do na Ballstáit a bheith in ann foráil a dhéanamh maidir le formáidí breise maidir leis na sonraí a thuairisciú a d'fhéadfadh a bheith níos éasca do dhaoine inchánacha áirithe a chomhlíonadh.
- (15) Chun an comhchuibhiú is gá a bhaint amach agus sonraí ar sholáthairtí trasteorann earraí agus seirbhísí á dtuairisciú, ba cheart an fhaisnéis atá le tuairisciú a bheith mar an gcéanna i ngach Ballstát, gan na Ballstáit a bheith in ann sonraí breise a iarraidh.
- (16) Ba cheart do riaracháin chánach na sonraí is gá a fháil maidir le gach idirbheart faoi réir oibleagáid tuairiscithe. Chun an cuspóir sin a áirithiú, dealraíonn sé gur stuama ceangal a chur ar an gcustaiméir an t-idirbheart a thuairisciú. D'fhágfadh sé sin go bhféadfaí na sonraí sin a chros-seiceáil leis na sonraí a sholáthar an soláthróir agus go soláthrófaí an fhaisnéis nuair nár chomhlíon an soláthróir an oibleagáid tuairiscithe. Mar sin féin, d'fhéadfadh na bearta arna nglacadh ag na Ballstáit i ndáil le heisiúint sonrasc agus tuairisciú dóthain ráthaíochtaí a thabhairt go gcuirfidh an soláthróir na sonraí ar fáil don riarachán cánach aon uair a eiseofar sonrasc. Sna himthosca sin, ba cheart cead a bheith ag na Ballstáit diúltú don riail sin, gan faighteoir na n-earraí agus faighteoir na seirbhísí a eisiamh ón oibleagáid na sonraí maidir leis na hidirbhearta sin a thuairisciú.

(17) Tá ceanglais tuairiscithe éagsúla curtha i bhfeidhm ag roinnt Ballstát maidir le hidirbhearta laistigh dá gcríocha, agus bíonn ualaí suntasacha riaracháin ann mar thoradh air sin do dhaoine inchánacha a oibríonn i mBallstáit éagsúla, toisc gur gá do na daoine sin a gcórais chuntasaíochta a oiriúnú chun na ceanglais sin a chomhlíonadh. Chun na costais a eascraíonn as an éagsúlacht sin a sheachaint, ba cheart do na córais a chuirtear chun feidhme sna Ballstáit chun soláthairtí earraí agus seirbhísí ar comaoin idir daoine inchánacha laistigh dá gcríocha a thuairisciú na gnéithe den chóras a chuirtear chun feidhme le haghaidh soláthairtí trasteorann earraí agus seirbhísí a chomhlíonadh. Ba cheart do na Ballstáit foráil a dhéanamh maidir leis na modhanna leictreonacha chun an fhaisnéis a tharchur agus, mar is amhlaidh i gcás soláthairtí trasteorann earraí agus seirbhísí, ba cheart don duine inchánach a bheith in ann na sonraí a chur isteach i gcomhréir leis an gcaighdeán Eorpach a leagtar síos i gCinneadh Cur Chun Feidhme (AE) 2017/1870, cé go bhféadfadh an Ballstát ábhartha foráil a dhéanamh maidir le caighdeáin bhreise chun na sonraí a tharchur. Ba cheart don duine inchánach a bheith in ann na sonraí a tharchur go díreach nó ba cheart do thríú páirtí iad a tharchur thar ceann an duine inchánach sin nó trí thairseach phoiblí, má tá sé ar fáil.

- (18) Níor cheart é a bheith d'oibleagáid ar na Ballstáit ceanglais tuairiscithe dhigitigh fíor-ama bunaithe ar idirbhearta a chur chun feidhme le haghaidh soláthairtí earraí agus seirbhísí ar chomaoin laistigh dá gcéim, seachas na cinn sin atá faoi réir na gceanglas tuairiscithe maidir le soláthairtí trasteorann earraí agus seirbhísí. Mar sin féin, má tá siad chun an ceanglas sin a chur chun feidhme amach anseo, ba cheart dóibh é sin a dhéanamh i gcomhréir leis na rialacha nua i dtaca le ceanglais tuairiscithe dhigitigh le haghaidh féinsoláthairtí agus soláthairtí earraí agus seirbhísí arna ndéanamh idir daoine inchánacha laistigh de chríoch Ballstáit atá ailínithe leis na ceanglais tuairiscithe dhigitigh le haghaidh soláthairtí trasteorann earraí agus seirbhísí. Ba cheart do na Ballstáit a bhfuil córas tuairiscithe le haghaidh na n-idirbheart sin i bhfeidhm acu cheana féin na córais sin a oiriúnú chun a áirithiú go dtuairiscítear na sonraí i gcomhréir leis na ceanglais tuairiscithe dhigitigh le haghaidh féinsoláthairtí agus soláthairtí earraí agus seirbhísí arna ndéanamh idir daoine inchánacha laistigh de chríoch Ballstáit.
- (19) Chun meastóireacht a dhéanamh ar éifeachtacht na gceanglas tuairiscithe dhigitigh, ba cheart don Choimisiún tuarascáil mheasúnachta a ullmhú ina ndéanfar meastóireacht ar thionchar an ríomhshonrasctha agus na gceanglas tuairiscithe dhigitigh laistigh den Aontas agus na gceanglas tuairiscithe dhigitigh intíre ar éifeachtacht bhailiú CBL agus ar laghdú na bearna CBL agus ar na costais a bhaineann le cur chun feidhme agus le comhlíontacht do dhaoine inchánacha agus do riaracháin chánach, chun a fhíorú an bhfuil a chuspóirí bainte amach ag an gcóras nó an bhfuil gá le tuilleadh coigeartuithe.
- (20) Ba cheart do na Ballstáit a bheith in ann leanúint de bhearta eile a chur chun feidhme chun a áirithiú go mbaileofar CBL i gceart agus chun imghabháil a chosc. Mar sin féin, níor cheart dóibh a bheith in ann oibleagáidí tuairiscithe ginearálta breise atá bunaithe ar idirbhearta a fhorchur ar na hidirbhearta a chumhdaítear leis na ceanglais tuairiscithe dhigitigh, ach amháin má cheanglaítear é ar an leibhéal náisiúnta chun tuairisceán CBL a ullmhú agus a chur isteach nó chun críoch iniúchóireachta. Ciallaíonn sé go bhfuil cead ag na Ballstáit – mar aon leis na hoibleagáidí tuairiscithe fíor-ama a shonraítear sa Treoir – a n-uirlisí tuairiscithe intíre a choinneáil bunaithe, mar shampla, ar chóras SAF-T, chomh maith le hoibleagáidí tuairiscithe nach de chineál ginearálta iad, mar shampla scipéid airgid. Ina theannta sin, níl na Ballstáit teoranta maidir lena bhféidearthachtaí faisnéis a iarraidh ó dhaoine inchánacha tráth na n-iniúchtaí, ós rud é nach bhfaightear an fhaisnéis sin ach ar iarraidh ón mBallstát agus nach toradh í ar thuirisciú gníomhach na ndaoine inchánacha.

- (20a) Chun an nós imeachta um bailiú CBL a shimpliú nó chun cineálacha áirithe imghabhála nó seachanta cánach a chosc, chuir roinnt Ballstát oibleagáid intíre i bhfeidhm maidir le tuairisciú digiteach fíor-ama bunaithe ar idirbhearta, le húdarú a fuarthas roimhe seo ar bhonn Airteagal 395 i gcásanna inar ghá. Rinne na Ballstáit sin agus na daoine inchánacha atá bunaithe ina gcéiríochtaí infheistíochtaí suntasacha le déanaí chun feidhmiú na gcóras sin agus gnóthú na gcuspóirí sin a áirithiú. I bhfianaise an mhéid sin, ba cheart go mbeadh ar na Ballstáit sin, ar bhonn eisceachtúil, a gcórais a oiriúnú chun a áirithiú go dtuairisceofar na sonraí i gcomhréir leis na ceanglais tuairiscithe dhigitigh le haghaidh féinsoláthairtí agus soláthairtí earraí agus seirbhísí arna ndéanamh idir daoine inchánacha laistigh dá gcéiríoch faoi 2035, ach amháin má nochtar sa tuarascáil mheasúnaithe ón gCoimisiún easnamh i bhfeidhmiú an chórais tuairiscithe dhigitigh trasteorann, rud a d'fhéadfadh a bheith ina chúis le síneadh breise a chur leis an spriocdháta chun gur féidir a gcóras tuairiscithe intíre a ailíniú, más gá.
- (21) D'eascair deacrachtaí áirithe as an ngeilleagar ardán maidir le cur i bhfeidhm na rialacha CBL – go háirithe bunú an stádais inchánaigh do sholáthróir na seirbhíse agus cothrom iomaíochta idir fiontair bheaga agus mheánmhéide (FBManna) agus gnólachtaí eile.
- (22) Mar thoradh ar an ngeilleagar ardán, tá saobhadh gan údar ann ar an iomaíocht idir soláthairtí a dhéantar trí ardáin ar líne a éalaíonn ó chánachas CBL, agus soláthairtí a dhéantar sa gheilleagar traidisiúnta atá faoi réir CBL. Tar éis na ríomhthráchtála ba ghéire an saobhadh sa dá earnáil is mó de chuid an gheilleagair ardán, is é sin earnáil na cóiríochta gearrthearma ar cíos agus an earnáil iompair paisinéirí de bhóthar. Aithnítear, áfach, go bhféadfadh an éagothromaíocht sin a bheith níos soiléire i roinnt Ballstát ná i mBallstáit eile.
- (23) Chun aghaidh a thabhairt ar shaobhadh na hiomaíochta in earnáil na cóiríochta gearrthearma ar cíos agus in earnáil an iompair paisinéirí de bhóthar, ba cheart rialacha a leagan síos chun an ról a bhíonn ag ardáin ioncam CBL a bhailiú a athrú (ag teacht chun bheith ina 'soláthróir measta'). Faoi shamhail an tsoláthróra mheasta sin, ar ficsean dlíthiúil é nach bhfuil aon tionchar aige ar rialacha atá lasmuigh den reachtaíocht CBL, ba cheart ceangal a chur ar ardáin CBL a ghearradh i gcás nach ngearrann soláthróirí foluiteacha é ós rud é, mar shampla, gur daoine neamh-inchánacha nó gur daoine inchánacha iad a bhaineann leas as an scéim speisialta d'fhiontair bheaga.

- (23a) Chun neodracht CBL a chaomhnú, níor cheart a mheas gur ‘soláthróir measta’ é ardán, agus dá bhrí sin níor cheart dó CBL a ghearradh, nuair a sholáthraíonn soláthróirí foluiteacha uimhir aitheantais chun críocha CBL agus nuair a dhearbhaíonn siad go ngearrfaidh siad an CBL a bheadh dlite ar shlí eile ag an soláthróir measta.
- (24) Mar sin féin, i gcás ina measann na Ballstáit nach bhfuil aon saobhadh iomaíochta den sórt sin ina mBallstát, is iomchuí an deis a thabhairt dóibh daoine inchánacha a bhaineann leas as an scéim speisialta d’fhiontair bheaga laistigh dá gcríoch a eisiamh ó raon feidhme ‘riail an tsoláthóra mheasta’, ar daoine iad a bheadh faoi réir na rialach sin go córasach murach sin. Féadfaidh na Ballstáit na coinníollacha a bhunú faoina bhfeidhmítear an rogha sin. Agus iad ag dul leis an rogha sin, ba cheart do na Ballstáit a bheith in ann í a fheidhmiú ar bhealach nach gcuirfeadh aon ualach riaracháin míchuí ar an duine a sholáthraíonn an soláthar seirbhísí cóiríochta ar cíos gearrthéarmach nó seirbhísí iompair de bhóthar do phaisinéirí nó ar an duine a éascaíonn an soláthar sin. I ndáil leis sin, níor cheart a mheas gur díréireach é faisnéis a éileamh atá riachtanach lena bhunú an mbaineann an soláthróir foluiteach leas as an scéim speisialta d’fhiontair bheaga. Mar sin féin, i gcás ina mbaineann Ballstát leas as rogha mar sin, beidh sin gan dochar don fhreagracht ghinearálta atá ar na hardáin rialacha an tsoláthóra mheasta a chomhlíonadh.
- (25) Chun leibhéal íosta comhsheasmhachta a áirithiú idir córais éagsúla náisiúnta CBL maidir leis an gcaoi a gcaitear le soláthar seirbhísí cóiríochta gearrthearmaí ar cíos, ba cheart a mheas go bhfuil feidhm chomhchosúil ag an tseirbhís cíosa sin le hearnáil na n-óstán i gcás ina mbíonn an tseirbhís sin gan bhriseadh, ina soláthraítear don duine céanna í, ar feadh 30 oíche ar a mhéad. Mar sin féin, chun oiriúnú do shainiúlachtaí náisiúnta éagsúla na hearnála, ba cheart an deis a bheith ag na Ballstáit go mbeadh seirbhísí cóiríochta ar chíos gearrthéarmach faoi réir critéir, coinníollacha agus teorainneacha áirithe de réir a ndlíthe náisiúnta.
- (25a) Déanann Ballstáit áit an tsoláthair le haghaidh na seirbhíse éascaithe arna soláthar ag na hardáin do dhaoine neamh-inchánacha a léirmhíniú ar bhealach difriúil. Is gá, dá bhrí sin, an riail sin a shoiléiriú agus critéar coiteann a áirithiú.

- (26) Chun nach n- áireofar ardáin sa scéim speisialta do ghníomhairí taistil, i gcás idirbhearta faoina meastar iad a bheith ina ‘soláthróir measta’, ba cheart a shoiléiriú nach dtagann na hidirbhearta sin faoi raon feidhme na scéime speisialta sin. Ar an gcaoi chéanna, ba cheart a áirithiú nach gcumhdaítear gníomhairí taistil leis an rialail maidir le ‘soláthróir measta’.
- (27) Tá an togra seo gan dochar do na rialacha a leagtar síos le gníomhartha dlí eile de chuid an Aontais, go háirithe Rialachán (AE) 2022/2065 ó Pharlaimint na hEorpa agus ón gComhairle an 19 Deireadh Fómhair 2022 maidir le Margadh Aonair do Sheirbhísí Digiteacha agus lena leasaítear Treoir 2000/31/CE (an Gníomh um Sheirbhísí Digiteacha)⁹ lena rialaítear gnéithe eile de sholáthar na seirbhísí ag ardáin ar líne, mar shampla oibleagáidí is infheidhme maidir le soláthraithe ardán ar líne lena gceadaítear do thomhaltóirí cianchonarthaí a thabhairt i gcrích le trádálaithe.
- (28) Treoracha (AE) 2017/2455¹⁰ agus 2019/1995¹¹ ón gComhairle lena leasaítear Treoir 2006/112/CE a mhéid a bhaineann leis na rialacha CBL lena rialaítear an cháin ar ghníomhaíocht ríomhthráchtála trasteorann idir gnólachtaí agus tomhaltóirí san Aontas. Leis na Treoracha leasaitheacha sin laghdaíodh saobhadh iomaíochta, comhar riaracháin feabhsaithe agus tugadh isteach roinnt rudaí a shimpliú. D’éirigh go maith, den chuid is mó, leis na leasuithe a tugadh isteach leis na Treoracha sin a bhfuil feidhm acu ó 1 Iúil 2021, mar sin féin sainathníodh an gá atá ann le feabhsuithe áirithe.

⁹ Rialachán (AE) 2022/2065 ó Pharlaimint na hEorpa agus ón gComhairle an 19 Deireadh Fómhair 2022 maidir le Margadh Aonair do Sheirbhísí Digiteacha agus lena leasaítear Treoir 2000/31/CE (an Gníomh um Sheirbhísí Digiteacha) (IO L 277, 27.10.2022, lgh. 1–102).

¹⁰ Treoir (AE) 2017/2455 ón gComhairle an 5 Nollaig 2017 lena leasaítear Treoir 2006/112/CE agus Treoir 2009/132/CE a mhéid a bhaineann le hoibleagáidí áirithe cánach breisluacha i ndáil le soláthairtí seirbhísí agus ciandíol earraí (IO L 348, 29.12.2017, lch. 7).

¹¹ Treoir (AE) 2019/1995 ón gComhairle an 21 Samhain 2019 lena leasaítear Treoir 2006/112/CE a mhéid a bhaineann le forálacha a bhaineann le ciandíol earraí agus le soláthairtí intíre earraí áirithe.

(29) Chuige sin, ba cheart roinnt rialacha atá i bhfeidhm faoi láthair a shoiléiriú. Áirítear leis sin an riail maidir le ríomh an tairseach EUR 10 000 féilire-bhunaithe a leagtar síos in Airteagal 59c de Threoir 2006/112/CE, agus faoina bhun sin tá soláthairtí seirbhísí teileachumarsáide, craolacháin agus leictreonacha (TCL) agus ciandíol earraí laistigh den Chomhphobal, arna soláthar ag soláthróir atá bunaithe san Aontas agus nach bhfuil bunaithe ach i mBallstát amháin, is féidir leis nó léi fós a bheith faoi réir CBL sa Bhallstát ina bhfuil an duine inchánach a sholáthraíonn na seirbhísí TCL sin bunaithe, nó sa Bhallstát ina bhfuil na hearraí sin suite tráth a chuirtear tús lena seoladh nó lena n-iompar. Ba cheart Airteagal 59c de Threoir 2006/112/CE a leasú chun a áirithiú nach n-áirítear i ríomh an tairseach EUR 10 000 ach ciandíol earraí laistigh den Chomhphobal arna soláthar ón mBallstát ina bhfuil an duine inchánach bunaithe ach nach n-áireofar ciandíol a dhéantar as stoc earraí i mBallstát eile. Tá gá le mionleasuithe eile chun gnéithe praiticiúla áirithe a shoiléiriú, mar shampla seoladh suímh gréasáin a sholáthar.

(30) Ba cheart Treoir 2006/112/CE a leasú freisin chun a shoiléiriú go dtagann soláthairtí seirbhísí uile idir gnólachtaí agus tomhaltóirí a soláthraíodh laistigh den Aontas ag daoine inchánacha bunaithe lasmuigh den Aontas faoi raon feidhme na scéime speisialta maidir le seirbhísí a sholáthraíonn daoine inchánacha nach bhfuil bunaithe sa Chomhphobal (an scéim nach scéim de chuid an Aontais í), agus ní amháin soláthairtí seirbhísí do chustaiméirí atá bunaithe san Aontas Eorpach. Tar éis na rialacha nua maidir le rátaí CBL a thabhairt isteach le Treoir (AE) 2022/542 ón gComhairle¹² agus chun díolúintí a chumhdach faoi Airteagal 151 de Threoir 2006/112/CE maidir le soláthairtí earraí agus seirbhísí, *inter alia*, faoi shocrúithe taidhleoireachta agus consalachta agus soláthairtí chuig comhlachtaí idirnáisiúnta áirithe eile, is gá freisin scéimeanna OSS faoi Theideal XII, Caibidil 6 de Threoir 2006/112/CE a leathnú trína áirithiú go dtagann soláthairtí atá saor ó rátaí agus atá díolmhaithe ó CBL lena ngabhann ceart asbhainte, faoi raon feidhme na scéimeanna sin. Ina theannta sin, ba cheart Treoir 2006/112/CE a leasú chun an tráth faoinar féidir leis an duine inchánach a bhfuil leas á bhaint aige nó aici as na scéimeanna speisialta seo leasuithe a dhéanamh ar na tuairisceáin CBL ábhartha feadh na dtrí scéim simplithe atá ann faoi láthair; OSS neamh-Aontais, OSS an Aontais agus an tIonad Ilfhreastail Allmhairiúcháin ('IOSS'). Leis an soiléiriú sin, ceadófar do dhaoine inchánacha atá cláraithe do na scéimeanna ceartúcháin a dhéanamh ar na tuairisceáin CBL ábhartha suas go dtí an sprioc-am atá socraithe leis na tuairisceáin sin a chur isteach. Ina theannta sin, soiléirítear nach gceadaítear ceartúcháin ar thuairisceáin CBL a bhí ann roimhe seo ach amháin i dtuairisceáin CBL ar thréimhsí cánach ina dhiaidh sin. Ar deireadh, ba cheart uainiú an teagmhais inmhuirir i leith soláthairtí faoi na scéimeanna simplithe OSS neamh-Aontais a shocrú go soiléir chun difríochtaí i gcur i bhfeidhm na rialacha i measc na mBallstát a sheachaint.

¹² Treoir (AE) 2022/542) ón gComhairle an 5 Aibreán 2022 lena leasaítear Treoracha 2006/112/CE agus (AE) 2020/285 a mhéid a bhaineann le rátaí cánach breisluacha (IO L 107, 6.4.2022, lch. 1).

- (31) Go ginearálta, tá gá le haitheantas CBL i ngach Ballstát ina dtarlaíonn idirbhearta inchánacha. Chun na cásanna ina bhfuil gá le clárúcháin CBL iolracha a laghdú, áfach, thug Treoir (AE) 2017/2455 roinnt beart isteach i dTreoir 2006/112/CE chun an gá le clárúcháin CBL iolracha a íoslaghdú. Chun an gá le clárúcháin CBL iolracha a laghdú a thuilleadh, sainaitníodh roinnt beart sínidh chun tacú leis an gcuspóir go mbeadh clárú aonair CBL san Aontas. Ba cheart, dá bhrí sin, rialacha a leagan síos chun foráil a dhéanamh maidir leis na bearta sínidh sin.
- (32) I measc beart eile, le Treoir (AE) 2017/2455, cuireadh síneadh le raon feidhme den Mhion-ionad ilfhreastail a bheith ina OSS níos leithne, a chumhdaíonn na soláthairtí trasteorann seirbhísí go léir do dhaoine neamh-inchánacha a tharlaíonn san Aontas agus ciandíol earraí ar fad laistigh den Chomhphobal. Go heisceachtúil, is féidir le comhéadain leictreonacha, mar shampla margáí agus ardáin a thagann chun bheith ina soláthróirí measta le haghaidh soláthairtí earraí áirithe laistigh den Aontas soláthairtí intíre earraí áirithe a dhearbhu freisin i scéim OSS an Aontais. Chun tacaíocht a thabhairt don chuspóir go mbeidh clárú aonair CBL san Aontas, ba cheart raon feidhme scéim an Aontais a leathnú a thuilleadh chun soláthairtí eile earraí a chumhdach, lena n-áirítear soláthairtí earraí intíre idir gnólachtaí agus tomhaltóirí san Aontas ag daoine inchánacha nach bhfuil bunaithe sa Bhallstát tomhaltais, á áirithiú nach gá do ghnólachtaí clárú i gcomhair CBL i ngach Ballstát ina dtarlaíonn soláthairtí earraí den sórt sin do thomhaltóirí.

(33) De ghnáth, gearrtar CBL agus tugann soláthróir na n-earraí nó na seirbhísí cuntas uirthi. In imthosca áirithe, áfach, féadfaidh Ballstáit foráil a dhéanamh faoin sásra aistrithe táillí go mbeidh oibleagáid ar fhaighteoir an tsoláthair seachas an soláthróir cuntas a thabhairt ar an CBL atá dlite. Chun tacaíocht níos mó a thabhairt don chuspóir maidir le clárú aonair CBL san Aontas, ba cheart rialacha a leagan síos chun go ndéanfar an sásra aistrithe táillí a chur i bhfeidhm go héigeantach i gcásanna nach bhfuil na soláthróirí bunaithe sa Bhallstát ina bhfuil CBL dlite agus nach n-aithnítear iad chun críocha CBL sa Bhallstát sin. Agus earraí nó seirbhísí á soláthar do dhuine atá sainaitheanta le haghaidh CBL sa Bhallstát ina bhfuil an soláthar inchánach, ba cheart do na soláthróirí sin an t-aistriú táillí a chur i bhfeidhm. Chun críocha rialála, ba cheart soláthairtí den sórt sin a thuairisciú sa ráiteas achoimreach. Sa bhreis ar an úsáid éigeantach, féadfaidh na Ballstáit an sásra aistrithe táillí a chur i bhfeidhm freisin maidir le soláthairtí trádálaithe neamhbhunaithe a sholáthraíonn earraí nó seirbhísí do chustaiméir, gan beann ar stádas an chustaiméara sin. Mar sin féin, déantar soláthairtí atá faoi réir na scéime corrlaigh mar a leagtar amach i gCaibidil 4 de Theideal XII de Threoir 2006/112/CE a eisiamh ón sásra aistrithe táillí.

(34) [scriosta]

(35) [scriosta]

(36) Thug Treoir (AE) 2017/2455 isteach i dTreoir 2006/112/CE simpliú sonrath, IOSS, a dearadh chun an t-ualach comhlíontachta CBL atá bainteach le hallmhairiú d'earraí ar luach íseal do thomhaltóirí san Aontas a laghdú. Chun coinníollacha aonfhoirmeacha a áirithiú chun Treoir 2006/112/CE a chur chun feidhme, ba cheart cumhachtaí a thabhairt don Choimisiún chun an úsáid cheart agus an próiseas fíoraithe d'uimhreacha aitheantais CBL IOSS a dhaingniú i mbealach níos fearr chun críocha na díolúine dá bhforáiltear sa Threoir sin. Ba cheart go gceadódh an cumhachtú sin don Choimisiún gníomh cur chun feidhme a ghlacadh chun bearta speisialta a thabhairt isteach chun cineálacha áirithe imghabhála nó seachanta cánach a chosc. Baineann na bearta speisialta sin, *inter alia*, le huimhir uathúil na coinsíneachta a nascadh leis an uimhir aitheantais CBL IOSS. Ba cheart na cumhachtaí sin a fheidhmiú i gcomhréir leis an nós imeachta scrúdúcháin dá dtagraítear in Airteagal 5 de Rialachán (AE) Uimh. 182/2011 ó Pharlaimint na hEorpa agus ón gComhairle¹³ agus chun na críocha sin is é an rud ba cheart a bheith ann an coiste a bunaíodh le hAirteagal 58 de Rialachán (AE) Uimh. 904/2010 ó Pharlaimint na hEorpa agus ón gComhairle¹⁴.

¹³ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13).

¹⁴ Rialachán (AE) Uimh. 904/2010 ón gComhairle an 7 Deireadh Fómhair 2010 maidir le comhar riaracháin agus calaois a chomhrac i réimse na cánach breisluacha (IO L 268, 12.10.2010, lch. 1).

- (37) Bíonn clárúchán CBL soláthróra de dhíth nuair nach saináithnítear an soláthróir sin le haghaidh CBL sa Bhallstát ina bhfuil CBL dlite. Go háirithe, le haistriú a chuid earraí féin de chuid duine inchánach chuig Ballstát eile chun críocha, *inter alia*, gníomhaíocht a bhaineann le ríomhthráchtáil, spreagar gá le clárú sna Ballstáit óna n-aistrítear agus chuig a n-aistrítear na hearraí. Ag teacht leis an gcuspóir maidir le clárú aonair CBL san Aontas, ba cheart go laghdófar a thuilleadh na cásanna ina bhfuil gá le clárúcháin CBL iolracha trí fhoráil a dhéanamh do scéim nua faoi chuimsiú na scéimeanna OSS a chur i bhfeidhm, rud atá deartha go sonrach chun na hoibleagáidí comhlíontachta a bhaineann le haistrithe áirithe earraí dílse a shimpliú. Ina theannta sin, i gcás ina ndéanann duine inchánach aistriú earraí dílse thar ceann duine inchánach eile, agus sa mhéid nach ndéantar an t-aistriú ar iarraidh shainráite an duine inchánach eile sin, ceanglaítear ar an duine inchánach sin faisnéis áirithe maidir leis an aistriú a chur in iúl d'úinéir na n-earraí sin.
- (38) Le Treoir 2006/112/CE, déantar foráil maidir le cóireáil shimplithe CBL le haghaidh earraí a aistrítear faoi shocruithe stoic ar glao i gcás ina gcomhlíontar coinníollacha forordaithe áirithe. Ós rud é go bhfuil an scéim shimplithe OSS le haghaidh aistrithe earraí dílse cuimsitheach agus go gcuimsítear inti gluaiseachtaí trasteorann earraí a chumhdaítear faoi láthair le socruithe stoic ar glao faoi airteagal 17a den Treoir sin, is gá deireadh a chur de réir a chéile leis na socruithe seo trí dháta deiridh a chur san áireamh sula mbainfear na forálacha stoic ar glao ina n-iomláine i dTreoir 2006/112/CE. Ba cheart, dá bhrí sin, dáta deiridh an 30 Meitheamh 2028 a leagan síos, agus ina dhiaidh sin ní bheidh sé indéanta a thuilleadh aon socruithe stoic ar glao nua a dhéanamh. Maidir le socruithe stoic ar glao dar tús an 30 Meitheamh 2028 nó roimhe sin, ba cheart feidhm a bheith ag na coinníollacha ábhartha fós, lena n-áirítear teorainn ama 12 mhí chun úinéireacht na n-earraí sin a aistriú chuig an gceannaitheoir beartaithe. I gcomhthráth leis an dáta deiridh nua a chur san áireamh, ba cheart mír nua a chur isteach sna forálacha a bhaineann le socruithe stoic ar ghlaos chun a áirithiú go scoirfidh na socruithe sin d'fheidhm a bheith acu an 30 Meitheamh 2029, mar ní bheidh gá a thuilleadh leo ina dhiaidh sin.

- (38a) I bhfianaise na gcleachtas éagsúil atá i bhfeidhm sna Ballstáit maidir le daoine inchánacha a shainnaint, is iomchuí sprioc-am níos faide a thabhairt chun go bhféadfaí riail an tsoláthróra mheasta teacht i bhfeidhm ionas gur féidir aistriú go réidh chuig an riail nua.
- (39) [scriosta]
- (40) I gcomhréir le Dearbhú Comhpháirteach Polaitiúil an 28 Meán Fómhair 2011 ó na Ballstáit agus ón gCoimisiún maidir le doiciméid mhíniúcháin¹⁵, ghlac na Ballstáit mar chúram orthu féin, i gcásanna a bhfuil údar cuí leo, doiciméad amháin nó níos mó a chur leis an bhfógra maidir lena mbearta trasuite, ar doiciméid iad ina mínítear an gaol idir comhpháirteanna de threoir agus codanna comhfhreagracha na n-ionstraimí náisiúnta trasuite. I ndáil leis an Treoir seo, measann an reachtóir go bhfuil údar leis na doiciméid sin a tharchur.
- (41) Ós rud é nach féidir leis na Ballstáit cuspóirí na Treorach seo, is é sin an córas CBL a thabhairt isteach sa ré dhigiteach, a ghnóthú go leordhóthanach, ach, de bharr an gá le húsáid Cheanglais maidir le Tuairisciú Digiteach a chomhchuihiú agus a spreagadh, le feabhas a chur ar chóireáil CBL maidir le hardáin, agus le laghdú a chur ar na cásanna ina n-éilítear ar ghnó clárú i mBallstáit eile, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Treoir seo thar a bhfuil riachtanach chun na cuspóirí sin a ghnóthú.
- (42) Dá bhrí sin, ba cheart Treoir 2006/112/CE a leasú dá réir sin,

TAR ÉIS AN TREOIR SEO A GHLACADH:

Airteagal 0

Leasuithe ar Threoir 2006/112/CE le héifeacht ó theacht i bhfeidhm na Treorach seo

Leasaítear Treoir 2006/112/CE mar a leanas:

¹⁵ IO C 369, 17.12.2011, lch. 14.

(0) in Airteagal 143, cuirtear isteach an mhír seo a leanas:

‘1a. Chun críocha na díolúine dá ndéantar foráil i mír 1, pointe (ca), glacfaidh an Coimisiún gníomh cur chun feidhme chun bearta speisialta a thabhairt isteach chun cineálacha áirithe imghabhála nó seachanta cánach a chosc trí, *inter alia*, uimhir uathúil na coinsíneachta a nascadh leis an uimhir aitheantais CBL chomhfhreagrach dá dtagraítear in Airteagal 369q.

Déanfar an gníomh cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 5 de Rialachán (AE) Uimh. 182/2011 agus chun na críche sin is é an coiste arna bhunú le hAirteagal 58 de Rialachán (AE) Uimh. 904/2010 a bheidh sa choiste.’

(1) in Airteagal 218, cuirtear isteach an mhír seo a leanas:

‘2. De mhaolú ar mhír 1, féadfaidh na Ballstáit, de réir na gcoinníollacha a fhéadfaidh siad a leagan síos, an oibleagáid a fhorchur ar dhaoine inchánacha atá bunaithe laistigh dá gcríoch sonraisc leictreonacha a eisiúint le haghaidh soláthairtí earraí agus seirbhísí laistigh dá gcríoch, seachas iad siúd dá dtagraítear in Airteagal 262.’;

(2) in Airteagal 232, cuirtear isteach an mhír seo a leanas:

2. De mhaolú ar mhír 1, féadfaidh na Ballstáit a bhaineann leas an an rogha dá bhforáiltear in Airteagal 218(2), foráil a dhéanamh nach mbeidh úsáid ríomhshonrasc arna n-eisiúint ag daoine inchánacha atá bunaithe laistigh dá gcríoch faoi réir ghlacadh an fhaighteora atá bunaithe ina gcríoch.’

Airteagal 1

Leasuithe ar Threoir 2006/112/CE le héifeacht ón 1 Eanáir 2027

Leasaítear Treoir 2006/112/CE mar a leanas:

(0) in Airteagal 14a, cuirtear an méid seo a leanas in ionad mhír 2:

‘2. I gcás ina n-éascaíonn duine inchánach, trí úsáid a bhaint as comhéadan leictreonach, mar shampla, margadh, ardán, tairseach nó modhanna comhchosúla, soláthar earraí laistigh den Chomhphobal ag duine inchánach nach bhfuil bunaithe laistigh den Chomhphobal do dhuine inchánach, nó do dhuine dlítheanach neamh-inchánach, nach bhfuil a fháil earraí laistigh den Chomhphobal faoi réir CBL de bhun Airteagal 3(1) nó d’aon duine neamh-inchánach eile, measfar go bhfuair agus gur sholáthair an duine inchánach a éascaíonn an soláthar na hearraí sin é féin.

Déanfaidh an Coimisiún, faoin 1 Iúil 2027 ar a dhéanaí, tuarascáil mheasúnaithe a chur faoi bhráid Pharlaimint na hEorpa agus na Comhairle, ar bhonn na faisnéise a fuarthas ó na Ballstáit, maidir le feidhmiú na rialach soláthraithe measta agus, i gcás inarb iomchuí, tíolacfaidh sé togra reachtach chun síneadh breise a chur léi.’;

(1) Leasaítear Airteagal 17a mar a leanas:

(a) i mír 2, cuirtear an méid seo a leanas in ionad phointe (a):

‘(a) seolann nó iompraíonn duine inchánach, nó tríú páirtí thar a c(h)eann, an 30 Meitheamh 2028 nó roimhe, earraí chuig Ballstát eile d’fhonn na hearraí sin a sholáthar ansin, ag céim níos déanaí agus i ndiaidh dóibh teacht isteach san áit, chuig duine inchánach eile atá i dteideal úinéireacht ar na hearraí sin a ghlacadh i gcomhréir le comhaontú atá ann cheana féin idir na beirte inchánach;’;

(b) cuirtear an mhír seo a leanas isteach:

‘8. Scoirfidh an tAirteagal seo d’fheidhm a bheith aige an 30 Meitheamh 2029.’;

(2) i dTeideal V, Caibidil 3a, cuirtear an méid seo a leanas in ionad an cheannteidil:

‘CAIBIDIL 3a

Tairseach do dhaoine inchánacha a dhéanann soláthairtí áirithe d’earraí a chumhdaítear le hAirteagal 33, pointe (a), agus soláthairtí áirithe seirbhísí a chumhdaítear le hAirteagal 58’;

(3) Leasaítear Airteagal 59c mar a leanas:

(a) i mír 1, cuirtear an méid seo a leanas in ionad phointe (b):

‘(b) soláthraítear seirbhísí do dhuine neamh-inchánach atá bunaithe in aon Bhallstát seachas an Ballstát dá dtagraítear i bpointe (a), nó a bhfuil a sheoladh buan aige in aon Bhallstát eile nó a bhfuil gnáthchónaí air in aon Bhallstát eile, nó seoltar nó iompraítear earraí ón mBallstát dá dtagraítear i bpointe (a) chuig Ballstát eile; agus’;

(b) cuirtear an méid seo a leanas in ionad mhír 3:

‘3. Deonóidh an Ballstát dá dtagraítear i mír 1, pointe (a) an ceart do daoine inchánacha a dhéanann soláthairtí atá incháilithe faoin mír sin an ceart chun a roghnú go gcinnefar áit an tsoláthair i gcomhréir le hAirteagal 33, pointe (a), agus le hAirteagal 58, lena chumhdófar 2 bhliain féilire, in aon chás.

Meastar go bhfuil an rogha dá dtagraítear sa chéad fhomhír den mhír seo feidhmithe ag daoine inchánacha atá cláraithe sa scéim speisialta dá bhforáiltear i dTeideal XII, Caibidil 6, Roinn 3.’;

- (4) Cuirtear an méid seo a leanas in ionad Airteagal 66:

'Airteagal 66

1. De mhaolú ar Airteagail 63, 64 agus 65, féadfaidh Ballstáit foráil a dhéanamh go bhfuil CBL le bheith inmhuirearaithe i leith idirbheart áirithe nó catagóirí áirithe de dhuine inchánach, ag ceann de na hamanna a leanas:

- (a) tráth nach déanaí ná an t-am a eisítear an sonrasc;
- (b) tráth nach déanaí ná an t-am a fhaightear an íocaíocht;
- (c) i gcás nach n-eisítear sonrasc, nó ina n-eisítear sonrasc go déanach, laistigh d'am sonraithe nach déanaí ná dul in éag na teorann ama a fhorchuireann Ballstáit maidir le sonraisc a eisiúint de bhun an dara mír d'Airteagal 222, nó i gcás nach bhfuil teorainn ama den sórt sin forchurtha ag an mBallstát, laistigh de thréimhse shonraithe ó dháta an teagmhais inmhuirir.

2. Ní bheidh feidhm ag an maolú dá ndéantar foráil i mír 1 maidir leis na soláthairtí a leanas:

- (a) soláthairtí seirbhísí a chumhdaítear leis an scéim speisialta mar a leagtar amach i dTeideal XII, Caibidil 6, Roinn 2 i gcás inar duine inchánach a bhfuil cead aige nó aici an scéim speisialta sin a úsáid i gcomhréir le hAirteagal 359 a dhéanann na soláthairtí sin;
- (b) soláthairtí a chumhdaítear leis an scéim speisialta mar a leagtar amach i dTeideal XII, Caibidil 6, Roinn 3 i gcás inar duine inchánach a bhfuil cead aige nó aici an scéim sin a úsáid i gcomhréir le hAirteagal 369b a dhéanann na soláthairtí sin;
- (c) soláthairtí seirbhísí ar ina leith a bhfuil CBL iníoctha ag an gcustaiméir de bhun Airteagal 196;
- (d) soláthairtí nó aistrithe earraí dá dtagraítear in Airteagal 67.;

(5) cuirtear an méid seo a leanas in ionad na chéad mhíre in Airteagal 167a:

‘Féadfaidh Ballstáit foráil a dhéanamh, laistigh de scéim roghnach, maidir le ceart asbhainte duine inchánach nach dtagann a CBL de bheith inmhuirir ach amháin i gcomhréir le hAirteagal 66(1), pointe (b), go gcuirfead an ceart asbhainte sin siar go dtí go mbeidh an CBL ar na hearraí nó ar na seirbhísí arna soláthar don duine sin íoctha leis an soláthróir.’;

(6) [scriosta]

(7) [scriosta]

(8) in Airteagal 226,

cuirtear an méid seo a leanas in ionad phointe 7a:

‘(7a) i gcás ina dtagann an CBL de bheith inmhuirir tráth a fhaightear an íocaíocht i gcomhréir le hAirteagal 66(1), pointe (b), agus ina dtagann an ceart asbhainte chun cinn tráth a dtagann an cháin in-asbhainte de bheith inmhuirir, maidir le ‘cuntasaíocht bunaithe ar airgead tirim’ a lua;

(9) [scriosta]

(10) Scriostar Airteagal 237;

(11) Cuirtear an méid seo a leanas in ionad Airteagal 359:

‘Airteagal 359

Ceadóidh na Ballstáit d’aon duine inchánach nach bhfuil bunaithe laistigh den Chomhphobal agus a sholáthraíonn seirbhísí do dhuine neamh-inchánach an scéim speisialta seo a úsáid. Beidh feidhm ag an scéim speisialta sin maidir leis na seirbhísí uile sin a sholáthraítear laistigh den Chomhphobal.’;

(11a) in Airteagal 361(1), cuirtear an méid seo a leanas in ionad phointe (c):

‘(c) seoladh leictreonach lena n-áirítear, i gcás ina mbeidh fáil orthu, suíomhanna gréasáin;’;

(11b) Cuirtear an méid seo a leanas in ionad Airteagal 368:

‘Airteagal 368

An duine inchánach nach bhfuil bunaithe sa Chomhphobal a bhfuil leas á bhaint aige nó aici as an scéim speisialta seo, i leith seirbhísí a chumhdaítear leis an scéim speisialta seo, ní fhéadfaidh sé nó sí CBL a asbhaint, ar CBL é a thabhaítear sa Bhallstát tomhaltais de bhun Airteagal 168 den Treoir seo. D’ainneoin Airteagal 1, pointe (1) de Threoir 86/560/CEE, déanfar aisíocaíocht leis an duine inchánach atá i gceist i gcomhréir leis an Treoir sin. Ní bheidh feidhm ag Airteagal 2(2) ná ag Airteagal 4(2) de Threoir 86/560/CEE maidir le hearraí agus seirbhísí a úsáidtear chun críocha soláthairtí seirbhísí a chumhdaítear leis an scéim speisialta seo.

I gcás ina gceanglaítear ar an duine inchánach a bhfuil úsáid á baint aige as an scéim speisialta seo a bheith cláraithe i mBallstát le haghaidh gníomhaíochtaí nach gcumhdaítear leis an scéim speisialta seo, déanfaidh sé CBL a asbhaint, ar CBL é a thabhaítear sa Bhallstát sin i leith a ghníomhaíochtaí inchánach a chumhdaítear leis an scéim speisialta seo, sa tuairisceán CBL atá le cur isteach de bhun Airteagal 250 den Treoir seo.’;

(11c) cuirtear an t-airteagal seo a leanas isteach:

'Airteagal 369aa

Maidir le soláthar gáis trí chórais gáis nádúrtha laistigh de chríoch an Chomhphobail nó aon líonra atá nasctha le córas den sórt sin, soláthar leictreachais agus soláthar fuinnimh teasa nó fuaraithe trí líonraí téimh nó fuaraithe, i gcomhréir leis na coinníollacha a leagtar síos in Airteagal 39, i gcás ina ndéanann duine inchánach nach bhfuil bunaithe sa Bhallstát ina bhfuil na hearraí faoi réir CBL an méid sin a sholáthar do dhuine inchánach nó duine dlítheanach neamh-inchánach nach bhfuil na hearraí arna bhfáil aige laistigh den Chomhphobal faoi réir CBL de bhun Airteagal 3(1) nó d'aon duine neamh-inchánach eile, meastar, chun críocha chur i bhfeidhm Airteagal 369b, gur ciandíolacháin earraí laistigh den Chomhphobal atá sa mhéid sin go dtí an 1 Iúil 2028.';

(12) cuirtear an méid seo a leanas in ionad na chéad mhíre in Airteagal 369j:

'An duine inchánach a bhfuil leas á bhaint aige nó aici as an scéim speisialta seo, i leith a g(h)níomhaíochtaí inchánach a chumhdaítear leis an scéim speisialta seo, ní fhéadfaidh sé nó sí CBL a asbhaint, ar CBL é a thabhaítear sna Ballstáit tomhaltais de bhun Airteagal 168 den Treoir seo. D'ainneoin Airteagal 1, pointe (1) de Threoir 86/560/CEE, Airteagal 2, pointe (1), Airteagal 3, agus Airteagal 8(1), pointe (e) de Threoir 2008/9/CE, déanfar an duine inchánach i gceist a aisíoc i gcomhréir leis na Treoracha sin. Ní bheidh feidhm ag Airteagal 2(2) ná ag Airteagal 4(2) de Threoir 86/560/CEE maidir le haisíocaíochtaí a bhaineann le hearraí agus seirbhísí a úsáidtear chun críocha soláthairtí earraí a chumhdaítear leis an scéim speisialta seo.';

(12a) in Airteagal 369m, cuirtear an mhír seo a leanas isteach:

‘1a. Ní bheidh feidhm ag mír 1 maidir le daoine inchánacha atá faoi réir na scéime speisialta dá bhforáiltear i dTeideal XII, Caibidil 1, Roinn 2.’;

(12b) Leasaítear Airteagal 369p mar a leanas:

(a) i mír 1, cuirtear an méid seo a leanas in ionad phointe (c):

‘(c) seoladh leictreonach agus, i gcás ina mbeidh fáil orthu, suíomhanna gréasáin;’;

(b) Cuirtear an méid seo a leanas in ionad mhír 3, pointe (c):

‘(c) seoladh leictreonach agus, i gcás ina mbeidh fáil orthu, suíomhanna gréasáin;’;

(13) cuirtear an méid seo a leanas in ionad na chéad mhíre in Airteagal 369w:

‘An duine inchánach a bhfuil leas á bhaint aige nó aici as an scéim speisialta seo, i leith a g(h)níomhaíochtaí inchánach a chumhdaítear leis an scéim speisialta seo, ní fhéadfaidh sé nó sí CBL a asbhaint, ar CBL é a thabhaítear sna Ballstáit tomhaltais de bhun Airteagal 168 den Treoir seo. D’ainneoin Airteagal 1, pointe (1) de Threoir 86/560/CEE, agus Airteagal 2, pointe (1), Airteagal 3, agus Airteagal 8(1), pointe (e), de Threoir 2008/9/CE, déanfar an duine inchánach i gceist a aisíoc i gcomhréir leis na Treoracha sin. Ní bheidh feidhm ag Airteagal 2(2) ná ag Airteagal 4(2) de Threoir 86/560/CEE maidir le haisíocaíochtaí a bhaineann le hearraí agus seirbhísí a úsáidtear chun críocha soláthairtí earraí a chumhdaítear leis an scéim speisialta seo.’;

Airteagal 2

Leasuithe ar Threoir 2006/112/CE le héifeacht ón 1 Iúil 2028

Leasaítear Treoir 2006/112/CE mar a leanas:

- (1) [scriosta]
- (2) [scriosta]
- (3) cuirtear an t-airteagal seo a leanas isteach:

‘Airteagal 28a

1. D’ainneoin Airteagal 28, maidir le duine inchánach a éascaíonn laistigh den Aontas, trí chomhéadan leictreonach, mar shampla, margadh, ardán, tairseach nó modh comhchosúil eile a úsáid, seirbhísí soláthair cóiríochta gearrthearma ar cíos, is é sin, cóiríocht a ligean ar cíos gan bhriseadh don duine céanna ar feadh uasmhéid 30 oíche, nó soláthar iompair paisinéirí de bhóthar, measfar go bhfuair agus gur sholáthair an duine sin na seirbhísí sin iad féin, ach amháin más duine é an duine a chuireann na seirbhísí sin ar fáil a rinne an méid seo a leanas:

- (a) a sholáthair don duine inchánach a éascaíonn an soláthar a uimhir aitheantais chun críocha CBL arna heisiúint sna Ballstáit ina ndéantar an soláthar, nó an uimhir aitheantais a leithdháileadh orthu i gcomhréir le hAirteagal 362 nó Airteagal 369d; agus
- (b) a dhearbhaigh don duine inchánach a éascaíonn an soláthar go ngearrfaidh sé aon CBL dlite ar an soláthar sin.’;

2. Chun críocha mhír 1, ciallóidh seirbhísí iompair paisinéirí de bhóthar a dhéantar laistigh den Aontas an chuid den tseirbhís a ndéantar difear di idir dhá phointe den Aontas.
 - 2a. Ní bheidh feidhm ag mír 1 maidir le soláthairtí arna ndéanamh faoin scéim speisialta i gCaibidil 3 de Theideal XII.
3. Féadfaidh na Ballstáit a cheangal go mbailíochtóidh an duine inchánach a éascaíonn an soláthar an uimhir aitheantais chun críocha CBL dá dtagraítear i bpointe (a) de mhír 1, agus úsáid á baint as na modhanna iomchuí arna mbunú i gcomhréir leis an dlí náisiúnta.
4. D'ainneoin mhír 1, féadfaidh na Ballstáit soláthairtí a dhéantar laistigh dá gcríoch ó thaobh seirbhísí cóiríochta gearrthearma ar cíós, seirbhísí iompair paisinéirí de bhóthar, nó iad araon, a dhéantar faoin scéim speisialta i gCaibidil 1, Roinn 2, de Theideal XII, a eisiamh ó raon feidhme mhír 1.
5. I gcás inar fheidhmigh Ballstát an rogha i mír 4, cuirfidh sé sin in iúl don Choiste um CBL. Foilseoidh an Coimisiún liosta cuimsitheach de na Ballstáit a d'fheidhmigh an rogha sin.
6. Faoin 1 Iúil 2033, cuirfidh an Coimisiún tuarascáil faoi bhráid na Comhairle ina ndéanfar meastóireacht ar oibriú an Airteagail seo agus ar chur i bhfeidhm na rialacha CBL maidir le seirbhísí éascaíochta, lena n-áirítear an tionchar ar fheidhmiú an mhargaidh inmheánaigh, éifeachtacht bhailiú CBL, agus má mheastar gur ghá, déanfaidh sé togra reachtach iomchuí.';

- (4) [scriosta]
- (5) [scriosta]
- (6) cuirtear an t-airteagal seo a leanas isteach:

‘Airteagal 46a

Is éard a bheidh in áit soláthair na seirbhíse éascaíochta a sholáthraítear do dhuine neamh-inchánach trí chomhéadan leictreonach a úsáid, mar shampla, margadh, ardán, tairseach nó modh comhchosúil eile, an áit a soláthraítear an t-idirbheart foluiteach i gcomhréir leis an Treoir seo.’;

- (7) in Airteagal 135(2), cuirtear isteach an pointe seo a leanas:

‘(aa) d’ainneoin phointe (a), measfar go bhfuil feidhm atá comhchosúil le feidhm earnáil na n-óstán ag cóiríocht a ligean ar cíós gan bhriseadh don duine céanna ar feadh 30 oíche ar a mhéad, faoi réir critéir, coinníollacha agus teorainneacha atá le leagan síos ag na Ballstáit.’;

- (7a) in Airteagal 135, cuirtear an mhír seo a leanas leis:

‘3. Cuirfidh na Ballstáit in iúl don Choiste um CBL, roimh an 1 Iúil 2028, téacs phríomhfhorálacha an dlí náisiúnta ina luann siad na critéir, na coinníollacha agus na teorainneacha a bhaineann le hAirteagal 135, mír 2, pointe (aa).

Faoin 31 Nollaig 2028, ar bhonn na faisnéise arna soláthar ag na Ballstáit mar a luaitear sa chéad mhír, foilseoidh an Coimisiún liosta cuimsitheach ina léireofar na critéir, na coinníollacha agus na teorainneacha a shocraigh na Ballstáit maidir le hAirteagal 135, mír 2, pointe (aa).’;

(8) [scriosta]

(9) cuirtear an t-airteagal seo a leanas isteach:

'Airteagal 136b

I gcás ina meastar go bhfuair agus gur sholáthair duine inchánach seirbhísí i gcomhréir le hAirteagal 28a, díolmhóidh Ballstáit soláthar na seirbhísí sin don duine inchánach sin.’;

(9a) in Airteagal 138(2), cuirtear an méid seo a leanas in ionad pointe (c):

‘(c) soláthar earraí, lena mbaineann aistriú chuig Ballstát eile, a bheadh i dteideal díolúine a fháil faoi mhír 1 agus pointe (a) agus pointe (b) dá mba rud é go ndearnadh é thar ceann duine inchánach eile. Ní bheidh feidhm ag mír 1, pointe (b) maidir le haistrithe a dhearbhaítear faoin scéim speisialta i Roinn 5 de Chaibidil 6 de Theideal XII.’;

(10) [scriosta]

(11) cuirtear an t-airteagal seo a leanas isteach:

'Airteagal 172a

I gcás ina meastar go bhfuair agus gur sholáthair duine inchánach seirbhísí i gcomhréir le hAirteagal 28a, ní dhéanfaidh na soláthairtí sin difear do cheart asbhainte an duine inchánach sin, gan beann ar cé acu atá nó nach bhfuil CBL in-asbhainte i leith na soláthairtí sin.’;

(12) Cuirtear an méid seo a leanas in ionad Airteagal 194:

‘Airteagal 194

1. (a) Gan dochar d’Airteagail 195 agus 196, i gcás inar duine inchánach nach bhfuil bunaithe agus nach saináithnítear chun críocha CBL trí bhíthin uimhir aitheantais aonair CBL dá dtagraítear in Airteagal 214, sa Bhallstát ina bhfuil an CBL dlite, a dhéanann an soláthar inchánach earraí nó seirbhísí, is é an duine dá soláthraítear na hearraí nó na seirbhísí an duine inchánach atá dlite CBL a íoc, i gcás inar saináithníodh an duine sin chun críocha CBL sa Bhallstát sin cheana féin.

(b) Ina theannta sin, i gcás ina soláthraíonn duine inchánach soláthar inchánach na n-earraí agus na seirbhísí nach bhfuil bunaithe sa Bhallstát ina bhfuil CBL dlite, féadfaidh na Ballstáit, i gcomhréir leis na coinníollacha a leagann siad síos, foráil a dhéanamh gurb é an duine dá soláthraítear na hearraí agus na seirbhísí a bheidh faoi dhliteanas i leith CBL a íoc.
2. Ní bheidh feidhm ag mír 1 den Airteagal seo maidir le soláthar earraí a dhéanann déileálaí inchánach mar a shainmhínítear in Airteagal 311(1), pointe (5), i gcás ina bhfuil na hearraí faoi réir CBL i gcomhréir leis na socruithe speisialta dá ndéantar foráil i dTeideal XII, Caibidil 4, Roinn 2 den Treoir seo.’;

(13) in Airteagal 222, cuirtear an méid seo a leanas in ionad na chéad mhíre:

‘Maidir le soláthairtí earraí a dhéantar i gcomhréir leis na coinníollacha a shonraítear in Airteagal 138 nó maidir le soláthairtí earraí nó seirbhísí dá bhfuil CBL iníoctha ag an gcustaiméir de bhun Airteagail 194 agus 196, eiseofar sonrasc tráth nach déanaí ná an cúigiú lá dhéag den mhí i ndiaidh na míosa ina dtarlaíonn an teagmhas inmhuirir.’;

(13a) In Airteagal 226, cuirtear an méid seo a leanas in ionad phointe 4:

‘(4) uimhir aitheantais CBL an chustaiméara, dá dtagraítear in Airteagal 214, faoina bhfuair an custaiméir soláthar earraí nó seirbhísí a bhfuil sé faoi dhliteanas ina leith CBL a íoc, nó faoina bhfuair sé soláthar earraí dá dtagraítear in Airteagal 138, ach amháin i gcás ina mbaintear úsáid as an scéim speisialta dá dtagraítear i Roinn 5 de Chaibidil 6 de Theideal XII;’;

(14) Leasaítear Airteagal 242a mar a leanas:

(a) cuirtear an mhír seo a leanas isteach:

‘1a. I gcás ina n-éascaíonn duine inchánach laistigh den Aontais, trí chomhéadan leictreonach, mar shampla, margadh, ardán, tairseach nó modh comhchosúil eile a úsáid, soláthar seirbhísí cóiríochta gearrthéarma ar cíos nó seirbhísí iompair paisinéirí de bhóthar, agus nach meastar go bhfuair agus gur sholáthair an duine sin na seirbhísí sin iad féin faoi Airteagal 28a, cuirfear d’oibleagáid ar an duine inchánach a éascaíonn an soláthar taifid a choimeád ar na soláthairtí sin. Beidh na taifid sin mionsonraithe a ndóthain lena chur ar a gcumas d’údaráis chánach na mBallstát ina bhfuil na soláthairtí sin inchánach a fhíorú gur tugadh cuntas ceart ar CBL.’;

(b) cuirtear an méid seo a leanas in ionad mhír 2:

‘2. Ní mór na taifid dá dtagraítear i mír 1 agus i mír 1a a chur ar fáil go leictreonach do na Ballstáit lena mbaineann arna iarraidh sin.

Féadfaidh na Ballstáit leanúint de na taifid sin a iarraidh ar bhonn rialta córasach go dtí go mbeidh rochtain uathoibríthe ar na taifid sin ar fáil.

Ní mór na taifid sin a choimeád ar feadh tréimhse 10 mbliana ó dheireadh na bliana ina ndearnadh an t-idirbheart.’;

(14a) cuirtear an t-airteagal seo a leanas isteach:

'Airteagal 242b

I gcás ina n-aistríonn duine inchánach earraí chuig Ballstát eile i gcomhréir le hAirteagal 17(1) thar ceann duine inchánach, cuirfidh an chéad duine inchánach sin in iúl don dara duine inchánach, ar a dhéanaí ar iompar nó ar sheoladh na n-earraí, go bhfuil a gcuid earraí á n-aistriú nó go mbeidh siad á n-aistriú, mura ndéantar an t-aistriú arna iarraidh sin go sainráite ag an dara duine inchánach.

(15) in Airteagal 262, leasaítear mír 1 mar a leanas:

(a) cuirtear an méid seo a leanas in ionad phointe (a):

‘(a) na faighteoirí a sainaitníodh chun críocha CBL ar sholáthair sé earraí dóibh i gcomhréir leis na coinníollacha a shonraítear in Airteagal 138(1) agus Airteagal 138(2), pointe (c), ach amháin i gcás ina mbaintear úsáid as an scéim speisialta dá dtagraítear i dTeideal XII, Caibidil 6, Roinn 5;’;

(b) cuirtear an méid seo a leanas in ionad phointe (c):

‘(c) na daoine inchánacha, agus na daoine dlítheanacha neamh-inchánacha a sainaitnítear chun críocha CBL, ar sholáthair an duine inchánach sin earraí nó seirbhísí a sainaitníodh chun críocha CBL dóibh, seachas earraí nó seirbhísí atá díolmhaithe ó CBL sa Bhallstát ina bhfuil an t-idirbheart inchánach, a bhfuil an faighteoir dlite an cháin a fóc ina leith de bhun Airteagail 194 sa mhéid is go n-aithnítear an custaiméir chun críocha CBL agus Airteagal 196.’;

(15a) in Airteagal 288, an chéad mhír, cuirtear an méid seo a leanas in ionad phointe (3):

‘(3) luach na n-idirbheart atá díolmhaithe de bhun Airteagail 136a, 136b, Airteagail 146 go 149 agus Airteagail 151, 152 agus 153;’;

(16) in Airteagal 306, cuirtear an mhír seo a leanas leis:

‘3. Ní bheidh feidhm ag an scéim speisialta dá dtagraítear i mír 1 den Airteagal seo maidir le soláthairtí a dhéantar faoi Airteagal 28a.’;

(17) cuirtear an méid seo a leanas in ionad an cheannteidil de Chaibidil 6 i dTeideal XII:

‘CAIBIDIL 6

Scéimeanna speisialta le haghaidh daoine inchánacha a sholáthraíonn seirbhísí do dhaoine neamh-inchánacha nó a dhéanann earraí, soláthairtí intíre áirithe earraí nó aistriú earraí dílse a chiandíol’;

(18) Cuirtear an méid seo a leanas in ionad Airteagal 365:

‘Airteagal 365

Taispeánfar sa tuairisceán CBL an uimhir aitheantais aonair CBL maidir leis an scéim speisialta seo a chur i bhfeidhm agus, le haghaidh gach Ballstáit tomhaltais ina bhfuil CBL dlite, an luach iomlán, gan CBL san áireamh, maidir le soláthairtí seirbhísí a chumhdaítear leis an scéim speisialta seo ar tharla an teagmhas inmhuirir ina leith le linn na tréimhse cánach agus an méid iomlán in aghaidh an ráta CBL chomhfhreagraigh. Tabharfar na rátaí CBL is infheidhme agus an méid iomlán CBL dlite le fios sa tuairisceán freisin, i gcás inarb ábhartha.

I gcás inar gá aon leasuithe ar an tuairisceán CBL go dtí an dáta a gceanglaítear an tuairisceán CBL sin a chur isteach i gcomhréir le hAirteagal 364, áireofar na leasuithe sin sa tuairisceán CBL sin.

I gcás ina dteastaíonn aon leasú ar thuarisceán CBL tréimhse cánach roimhe sin i ndiaidh an dáta ar ar éilíodh an tuairisceán CBL a chur isteach i gcomhréir le hAirteagal 364, cuirfear na leasuithe sin san áireamh i dtuarisceán CBL tréimhse cánach ina dhiaidh sin laistigh de 3 bliana ón dáta ar ar éilíodh an tuairisceán CBL bunaidh a chur isteach i gcomhréir le hAirteagal 364. Sainithneofar an Ballstát tomhaltais ábhartha, an tréimhse cánach agus an méid CBL a n-éilítear aon leasú ina leith sa tuairisceán CBL sin ina dhiaidh sin.’;

(19) cuirtear an méid seo a leanas in ionad theideal Roinn 3 i dTeideal XII, Caibidil 6:

‘Roinn 3

Scéim speisialta do chiandíol earraí laistigh den Chomhphobal, do sholáthairtí áirithe earraí laistigh de Bhallstát a dhéanann duine inchánach agus do sheirbhísí áirithe a sholáthraíonn daoine inchánacha atá bunaithe laistigh den Chomhphobal ach ní sa Bhallstát tomhaltais’;

(19a) Leasaítear Airteagal 369a mar a leanas:

(a) leasaítear pointe (2) mar seo a leanas:

(i) cuirtear an méid seo a leanas in ionad an tríú fhomhír:

‘I gcás nach bhfuil a ghnó bunaithe sa Chomhphobal ag duine inchánach, ach i gcás nach bhfuil buanbhunaíocht aige ann, is é an Ballstát ina dtosaíonn seoladh nó aistriú na n-earraí a bheidh sa Bhallstát aitheantais. I gcás an tsoláthair earraí, gan seoladh ná iompar na n-earraí, nó más sa Bhallstát céanna a thosaíonn agus a chríochnaíonn seoladh nó iompar na n-earraí a sholáthraítear i gcomhréir le hAirteagail 37 nó 39, is é an Ballstát ina ndéantar an soláthar a bheidh sa Bhallstát aitheantais. I gcás ina bhfuil níos mó ná aon Bhallstát amháin ann ina dtosaíonn seoladh nó aistriú na n-earraí nó ina tharlaíonn an soláthar, tabharfaidh an duine inchánach le fios cén ceann de na Ballstáit sin a bheidh sa Bhallstát aitheantais. Beidh an duine inchánach faoi cheangal ag an gcinneadh sin ar feadh na bliana féilire lena mbaineann agus ar feadh an 2 bhliain féilire ina dhiaidh sin;’;

(ii) cuirtear an fhomhír seo a leanas leis:

‘Is ionann an Ballstát aitheantais don scéim speisialta seo, áfach, agus an Ballstát aitheantais don scéim speisialta a leagtar síos i Roinn 5 de Chaibidil 6 de Theideal XII, i gcás ina bhfuil an duine sin cláraithe le haghaidh na scéime sin.’;

(b) leasaítear pointe (3) mar seo a leanas:

(i) cuirtear an méid seo a leanas in ionad phointe (c):

‘(c) i gcás soláthar earraí, gan seoladh nó iompar na n-earraí, nó i gcás ina dtosaíonn agus ina gcríochnaíonn seoladh nó iompar na n-earraí arna soláthar sa Bhallstát céanna, ina soláthraítear na hearraí sin do dhuine inchánach nó do dhuine dlítheanach neamh-inchánach nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d’aon duine neamh-inchánach eile, an Ballstát sin;’;

(ii) cuirtear an pointe seo a leanas leis:

‘(d) i gcás soláthar earraí i gcomhréir le hAirteagail 36, 37 agus 39, ina soláthraítear na hearraí sin do dhuine inchánach nó do dhuine dlítheanach neamh-inchánach, nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d’aon duine neamh-inchánach eile, an Ballstát ina meastar a dhéantar an soláthar;’;

(20) [scriosta]

(21) Cuirtear an méid seo a leanas in ionad Airteagal 369b:

‘Airteagal 369b

Ceadóidh na Ballstáit do na daoine inchánacha seo a leanas, seachas iad siúd a dhéanann soláthairtí díolmhaithe earraí agus seirbhísí nach n-eascaíonn in-asbhainteacht astu agus sin amháin, an scéim speisialta sin a úsáid:

- (a) duine inchánach a dhéanann ciandíol earraí laistigh den Chomhphobal;
- (b) duine inchánach a éascaíonn soláthar earraí i gcomhréir le hAirteagal 14a(2) gan seoladh ná iompar nó i gcás ina dtosaíonn agus ina gcríochnaíonn an seoladh nó an t-iompar sa Bhallstát céanna.
- (c) duine inchánach nach bhfuil bunaithe sa Bhallstát tomhaltais a sholáthraíonn seirbhísí do dhuine neamh-inchánach;

- (d) duine inchánach nach bhfuil bunaithe sa Bhallstát ina bhfuil na hearraí faoi réir CBL, a sholáthraíonn earraí i gcomhréir le hAirteagail 36, 37 agus 39, do dhuine inchánach nó do dhuine dlítheanach neamh-inchánach, nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d’aon duine neamh-inchánach eile;
- (e) duine inchánach nach bhfuil bunaithe sa Bhallstát ina bhfuil na hearraí faoi réir CBL, a sholáthraíonn earraí gan seoladh nó iompar nó ina dtosaíonn agus ina gcríochnaíonn an seoladh nó an t-iompar sa Bhallstát céanna do dhuine inchánach nó do dhuine dlítheanach neamh-inchánach, nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d’aon duine neamh-inchánach eile.
- (f) duine inchánach nach bhfuil bunaithe sa Bhallstát ar aistríodh earraí chuige faoin scéim speisialta a leagtar amach i roinn 5 de Chaibidil 6 de Theideal XII, i gcás ina bhfuil na hearraí sin faoi réir CBL i gcomhréir le hAirteagail 16, 18, 26 nó i gcás ina gceanglaítear coigeartú asbhainte i gcomhréir le Caibidil 5 de Theideal X.

Tá feidhm ag an scéim speisialta seo maidir leis na soláthairtí incháilithe sin uile sa Chomhphobal a dhéanann an duine inchánach lena mbaineann.’;

(22) Cuirtear an méid seo a leanas in ionad Airteagal 369g:

'Airteagal 369g

‘1. Taispeánfar sa tuairisceán CBL an uimhir aitheantais CBL dá dtagraítear in Airteagal 369d agus, le haghaidh gach Ballstáit tomhaltais, an luach iomlán gan CBL san áireamh, agus i gcás inarb ábhartha, na rátaí CBL is infheidhme, an méid iomlán in aghaidh an ráta CBL comhfhreagraigh agus an méid iomlán CBL atá dlite i leith na soláthairtí seo a leanas a chumhdaítear leis an scéim speisialta seo ar tharla an teagmhas inmhuirir ina leith le linn na tréimhse cánach:

- (a) ciandiól earraí laistigh den Chomhphobal;
- (b) soláthairtí seirbhísí;
- (c) soláthairtí earraí i gcomhréir le hAirteagail 36, 37 agus 39, i gcás ina soláthraítear na hearraí sin do dhuine inchánach nó do dhuine dlítheanach neamh-inchánach, nach bhfuil a éadálacha nó a héadálacha earraí laistigh den Chomhphobal faoi réir CBL de bhun Airteagal 3(1), nó d’aon duine neamh-inchánach eile;
- (d) soláthairtí earraí, lena n-áirítear ag duine inchánach a éascaíonn na soláthairtí sin i gcomhréir le hAirteagal 14a(2), gan seoladh nó iompar, nó i gcás ina dtosaíonn agus ina gcríochnaíonn an seoladh nó an t-iompar sa Bhallstát céanna, i gcás ina soláthraítear na hearraí sin do dhuine inchánach nó do dhuine dlítheanach neamh-inchánach nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d’aon duine neamh-inchánach eile;

- (e) soláthairtí earraí agus seirbhísí i gcomhréir le hAirteagail 16, 18 agus 26, tar éis aistriú earraí dílse faoin scéim speisialta mar a leagtar amach i Roinn 5 de Chaibidil 6 de Theideal XII.

Beidh leasuithe a bhaineann le tréimhsí cánacha roimhe sin dá ndéantar foráil i mír 5 den Airteagal seo sa tuairisceán CBL freisin.

2. I gcás ina soláthraítear earraí gan seoladh nó iompar nó i gcás ina seoltar nó ina n-iompraítear iad i mBallstáit seachas an Ballstát aitheantais nó uathu, is éard a bheidh sa tuairisceán CBL freisin an luach iomlán gan CBL san áireamh, agus i gcás inarb ábhartha, na rátaí CBL is infheidhme, an méid iomlán in aghaidh an ráta CBL comhfhreagraigh agus an méid iomlán CBL atá dlite i leith na soláthairtí seo a leanas a chumhdaítear leis an scéim speisialta seo, le haghaidh gach Ballstáit a seoltar agus a iompraítear na hearraí sin iontu nó uathu:

- (a) ciandíol earraí laistigh den Chomhphobal;
- (b) soláthairtí earraí, lena n-áirítear ag duine inchánach a éascaíonn na soláthairtí sin i gcomhréir le hAirteagal 14a(2), i gcás ina dtosaíonn agus ina gcríochnaíonn an seoladh nó an t-iompar sa Bhallstát céanna, i gcás ina soláthraítear na hearraí sin do dhuine inchánach nó do dhuine dlítheanach neamh-inchánach nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d'aon duine neamh-inchánach eile;
- (c) soláthairtí earraí i gcomhréir le hAirteagail 36, 37 agus 39, i gcás ina soláthraítear na hearraí sin do dhuine inchánach nó do dhuine dlítheanach neamh-inchánach, nach bhfuil a éadálacha earraí laistigh den Chomhphobal faoi réir CBL de bhun Airteagal 3(1), nó d'aon duine neamh-inchánach eile;

- (d) Soláthairtí earraí agus seirbhísí i gcomhréir le hAirteagail 16, 18 agus 26, tar éis aistriú earraí dílse faoin scéim speisialta mar a leagtar amach i Roinn 5 de Chaibidil 6 de Theideal XII.

I ndáil leis na soláthairtí dá dtagraítear sa mhír seo, áireofar sa tuairisceán CBL freisin an uimhir aitheantais aonair CBL nó an uimhir thagartha cánach arna leithdháileadh ag gach Ballstát a ndéantar na hearraí sin a sheoladh uathu nó a iompar iontu, más infhaighte.

Áireofar sa tuairisceán CBL an fhaisnéis dá dtagraítear sa mhír seo arna briseadh síos de réir an Bhallstáit tomhaltais.

3. I gcás ina bhfuil buanbhunaíocht ghnó amháin nó níos mó ag an duine inchánach a sholáthraíonn na seirbhísí a chumhdaítear leis an scéim speisialta seo seachas an ceann sa Bhallstát aitheantais, óna soláthraítear na seirbhísí, áireofar sa tuairisceán CBL freisin an luach iomlán gan CBL san áireamh, agus i gcás inarb ábhartha, na rátaí CBL is infheidhme, an méid iomlán in aghaidh an ráta CBL comhfhreagraigh agus an méid iomlán CBL atá dlite i leith na soláthairtí sin, le haghaidh gach Ballstáit ina bhfuil bunaíocht ghnó ag an duine inchánach sin, maille leis an uimhir aitheantais aonair CBL nó le huimhir thagartha cánach na bunaíochta sin, arna mbriseadh síos de réir an Bhallstáit tomhaltais.

4. I gcás ina bhfuil gá le coigeartú asbhainte i leith earraí a aistríodh i gcomhréir leis an scéim speisialta i Roinn 5 de Chaibidil 6 de Theideal XII, áireofar sa tuairisceán CBL na fachtóirí ábhartha as ar eascair an coigeartú agus an CBL atá dlite agus, i gcás earraí caipitiúla, dáta tosaigh na tréimhse coigeartaithe a thosaíonn tar éis an aistrithe.

5. I gcás inar gá aon leasuithe ar an tuairisceán CBL go dtí an dáta a gceanglaítear an tuairisceán CBL sin a chur isteach i gcomhréir le hAirteagal 369f, áireofar na leasuithe sin sa tuairisceán CBL sin.

I gcás ina dteastaíonn aon leasú ar thuairisceán CBL tréimhse cánach roimhe sin i ndiaidh an dáta ar ar éilíodh an tuairisceán CBL a chur isteach i gcomhréir le hAirteagal 369f, cuirfear na leasuithe sin san áireamh i dtuairisceán CBL tréimhse cánach ina dhiaidh sin laistigh de 3 bliana ón dáta ar ar éilíodh an tuairisceán CBL bunaidh a chur isteach i gcomhréir le hAirteagal 369f. Sainaitheofar an Ballstát tomhaltais ábhartha, an tréimhse cánach agus an méid CBL a n-éilítear aon leasú ina leith sa tuairisceán CBL sin ina dhiaidh sin.

6. Chun críche an Airteagail seo, ní áireofar sa tuairisceán CBL soláthairtí díolmhaithe earraí agus seirbhísí nach n-eascraíonn in-asbhainteacht astu.’;

(23) [scriosta]

(24) Leasaítear Airteagal 369p mar a leanas:

(a) i mír 1, cuirtear an pointe seo a leanas léi:

‘(e) stádas mar dhuine inchánach a mheastar ina leith go bhfuair agus gur sholáthair sé nó sí earraí i gcomhréir le hAirteagal 14a(1).’;

(b) i mír 3, cuirtear an pointe seo a leanas léi:

‘(f) stádas mar dhuine inchánach a mheastar ina leith go bhfuair agus gur sholáthair sé nó sí earraí i gcomhréir le hAirteagal 14a(1).’;

(25) [scriosta]

(26) Cuirtear an méid seo a leanas in ionad Airteagal 369t:

'Airteagal 369t

1. Taispeánfar sa tuairisceán CBL an uimhir aitheantais CBL dá dtagraítear in Airteagal 369q agus, le haghaidh gach Ballstáit tomhaltais ina bhfuil CBL dlite, an luach iomlán, gan CBL san áireamh, maidir le ciandíol earraí a onnmhairítear ó thríú críocha nó ó thríú tíortha a bhfuil an CBL innhuirearaithe ina leith le linn na tréimhse cánach agus an méid iomlán in aghaidh an ráta CBL comhfhreagraigh. Tabharfar na rátaí CBL is infheidhme agus an méid iomlán CBL dlite le fios sa tuairisceán freisin, i gcás inarb ábhartha.

2. I gcás inar gá aon leasuithe ar an tuairisceán CBL go dtí an dáta a gceanglaítear an tuairisceán CBL sin a chur isteach i gcomhréir le hAirteagal 369s, áireofar na leasuithe sin sa tuairisceán CBL sin.

I gcás ina dteastaíonn aon leasú ar thuairisceán CBL tréimhse cánach roimhe sin i ndiaidh an dáta ar ar éilíodh an tuairisceán CBL a chur isteach i gcomhréir le hAirteagal 369s, cuirfear na leasuithe sin san áireamh i dtuairisceán CBL tréimhse cánach ina dhiaidh sin laistigh de 3 bliana ón dáta ar ar éilíodh an tuairisceán CBL bunaidh a chur isteach i gcomhréir le hAirteagal 369s. Sainithneofar an Ballstát tomhaltais ábhartha, an tréimhse cánach agus an méid CBL a n-éilítear aon leasú ina leith sa tuairisceán CBL sin ina dhiaidh sin.';

(27) cuirtear an Roinn seo a leanas isteach i dTeideal XII, Caibidil 6:

‘Roinn 5

Scéim speisialta d’aistrithe earraí dílse

Airteagal 369xa

Chun críocha na Roinne seo, agus gan dochar d’fhorálacha eile de chuid an Chomhphobail, beidh feidhm ag na sainmhínithe seo a leanas:

- (1) ciallaíonn ‘aistriú earraí dílse’ earraí a aistriú chuig Ballstát eile i gcomhréir le hAirteagal 17(1), agus ní áirítear leis aistrithe earraí nach bhfuil aon cheart iomlán asbhainte ina leith sa Bhallstát sin.
- (2) ciallaíonn ‘Ballstát aitheantais’ an Ballstát ina bhfuil a ghnó bunaithe ag an duine inchánach nó, mura bhfuil a ghnó bunaithe sa Chomhphobal ag an duine inchánach sin, Ballstát ina bhfuil buanbhunaíocht ag an duine inchánach sin.

I gcás nach bhfuil a ghnó bunaithe sa Chomhphobal ag duine inchánach, ach i gcás ina bhfuil níos mó ná buanbhunaíocht amháin aige ann, is é an Ballstát ina bhfuil buanbhunaíocht agus ar ann a thugann an duine inchánach sin le tuiscint go mbainfidh sé úsáid as an scéim speisialta seo, a bheidh sa Bhallstát aitheantais. Beidh an duine inchánach faoi cheangal ag an gcinneadh sin ar feadh na bliana féilire lena mbaineann agus ar feadh an 2 bhliain féilire ina dhiaidh sin.

I gcás nach bhfuil a ghnó bunaithe sa Chomhphobal ag duine inchánach agus nach bhfuil buanbhunaíocht aige ann, is é an Ballstát ina dtosaíonn seoladh nó aistriú na n-earraí a bheidh sa Bhallstát aitheantais. I gcás ina bhfuil níos mó ná aon Bhallstát amháin ann ina dtosaíonn seoladh nó aistriú na n-earraí, tabharfaidh an duine inchánach le fios cén ceann de na Ballstáit sin a bheidh sa Bhallstát aitheantais. Beidh an duine inchánach faoi cheangal ag an gcinneadh sin ar feadh na bliana féilire lena mbaineann agus ar feadh an 2 bhliain féilire ina dhiaidh sin.

Is ionann an Ballstát aitheantais don scéim speisialta seo, áfach, agus an Ballstát aitheantais don scéim speisialta a leagtar síos i Roinn 3 de Chaibidil 6 de Theideal XII, i gcás ina bhfuil an duine sin cláraithe le haghaidh na scéime sin.’;

Airteagal 369xb

Ceadóidh Ballstáit d’aon duine inchánach a dhéanann aistrithe earraí dílse úsáid a bhaint as an scéim speisialta seo.

Beidh feidhm ag an scéim speisialta seo maidir le gach aistriú earraí dílse a dhéanann duine inchánach atá cláraithe don scéim speisialta seo.

Airteagal 369xc

Cuirfidh duine inchánach in iúl don Bhallstát aitheantais nuair a thosaíonn sé a gníomhaíochtaí inchánacha agus nuair a chuireann sé deireadh leo, ar gníomhaíochtaí iad a chumhdaítear leis an scéim speisialta seo, nó nuair a athraíonn sé na gníomhaíochtaí sin ar bhealach a fhágann nach gcomhlíonann an duine inchánach sin na coinníollacha is gá chun úsáid a bhaint as an scéim speisialta seo a thuilleadh. Déanfaidh an duine inchánach sin an fhaisnéis sin a chur in iúl go leictreonach.

Airteagal 369xd

Ní dhéanfar duine inchánach a bhaineann úsáid as an scéim speisialta seo, maidir leis na hidirbhearta inchánacha a dhéantar faoin scéim speisialta seo, a shainaithint chun críocha CBL ach sa Bhallstát aitheantais agus sa Bhallstát sin amháin. Chun na críche sin, bainfidh an Ballstát úsáid as an uimhir aitheantais aonair CBL a leithdháileadh cheana féin ar an duine inchánach i leith oibleagáidí an duine sin faoin gcóras inmheánach.

Airteagal 369xe

Déanfaidh an Ballstát aitheantais duine inchánach a eisiamh ón scéim speisialta in aon cheann de na cásanna a leanas:

- (a) i gcás ina gcuireann an duine inchánach sin in iúl don Bhallstát aitheantais nach ndéanann sé aistrithe earraí dílse a chumhdaítear leis an scéim speisialta seo a thuilleadh;
- (b) i gcás ina bhféadfar glacadh leis ar shlí eile go bhfuil deireadh le gníomhaíochtaí inchánacha an duine inchánach a chumhdaítear leis an scéim speisialta seo;
- (c) i gcás nach gcomhlíonann an duine inchánach sin na coinníollacha is gá chun úsáid a bhaint as an scéim speisialta seo a thuilleadh;
- (d) i gcás ina dteipeann go seasmhach ar an duine inchánach sin na rialacha a bhaineann leis an scéim speisialta seo a chomhlíonadh.

Airteagal 369xf

Déanfaidh an duine inchánach a bhfuil úsáid á baint aige as an scéim speisialta seo tuairisceán CBL le haghaidh gach míosa a chur faoi bhráid an Bhallstáit aitheantais trí mhodhanna leictreonacha, cé acu a rinneadh na haistrithe earraí a chumhdaítear leis an scéim speisialta seo nó nach ndearnadh. Cuirfear an tuairisceán CBL isteach faoi dheireadh na míosa i ndiaidh dheireadh na tréimhse cánach a chumhdaítear leis an tuairisceán CBL.

Airteagal 369xg

1. Taispeánfar sa tuairisceán CBL an uimhir aitheantais CBL dá dtagraítear in Airteagal 369xd agus, le haghaidh gach Ballstáit dá seoltar nó dá n-aistrítear earraí, luach iomlán gan CBL san áireamh na n-aistrithe a chumhdaítear leis an scéim speisialta seo ar tharla an teagmhas inmhuirir ina leith le linn na tréimhse cánach.

Beidh leasuithe a bhaineann le tréimhsí cánacha roimhe sin dá ndéantar foráil i mír 3 sa tuairisceán CBL freisin.

2. I gcás ina seoltar nó ina n-iompraítear earraí ó Bhallstáit seachas an Ballstát aitheantais, is éard a bheidh sa tuairisceán CBL freisin an luach iomlán gan CBL san áireamh de na haistrithe a chumhdaítear leis an scéim speisialta seo, maidir le gach Ballstát óna seoltar nó óna n-iompraítear na hearraí sin.

Áireofar sa tuairisceán CBL freisin an uimhir aitheantais aonair CBL nó an uimhir thagartha cánach arna leithdháileadh ag gach Ballstát a ndéantar na hearraí sin a sheoladh nó a iompar uathu, más infhaighte. Áireofar sa tuairisceán CBL an fhaisnéis dá dtagraítear sa mhír seo arna briseadh síos de réir an Bhallstáit a ndéantar na hearraí sin a sheoladh nó a iompar chuige.

3. I gcás inar gá aon leasuithe ar an tuairisceán CBL go dtí an dáta a gceanglaítear an tuairisceán CBL sin a chur isteach i gcomhréir le hAirteagal 369xf, áireofar na leasuithe sin sa tuairisceán CBL sin.

I gcás ina dteastaíonn aon leasú ar thuairisceán CBL tréimhse cánach roimhe sin i ndiaidh an dáta ar ar éilíodh an tuairisceán CBL a chur isteach i gcomhréir le hAirteagal 369xf, cuirfear na leasuithe sin san áireamh i dtuairisceán CBL tréimhse cánach ina dhiaidh sin laistigh de 3 bliana ón dáta ar ar éilíodh an tuairisceán CBL bunaidh a chur isteach i gcomhréir le hAirteagal 369xf. Sainaitheofar an Ballstát ábhartha a ndéantar na hearraí a sheoladh nó a iompar chuige agus uaidh, an tréimhse cánach agus an méid inchánach a n-éilítear aon leasú ina leith sa tuairisceán CBL sin ina dhiaidh sin.

Airteagal 369xh

1. Is in euro a shloinnfear an tuairisceán CBL.

Féadfaidh Ballstáit nach bhfuil an euro glactha acu a cheangal go sloinnfear an tuairisceán CBL ina n-airgeadra náisiúnta.

Más in airgeadraí eile a rinneadh na soláthairtí, úsáidfidh an duine inchánach a bhfuil úsáid á baint aige as an scéim speisialta seo an ráta malairte is infheidhme ar an dáta deiridh den tréimhse cánach, chun críocha an tuairisceán CBL a chomhlíonadh.

2. Déanfar an comhshó trí na rátaí malairte arna bhfoilsíú ag an mBanc Ceannais Eorpach don lá sin a chur i bhfeidhm, nó, mura bhfuil aon fhoilsíú ann an lá sin, ar an gcéad lá eile a bhfoilseofar é.

Airteagal 369xi

Chun críocha na scéime speisialta seo, tá díolúine ag éadáil earraí laistigh den Chomhphobal sa Bhallstát a ndéantar na hearraí a sheoladh nó a iompar chuige.

D'ainneoin Airteagal 214(1), ní eascróidh oibleagáid chlárúcháin i gcomhréir leis an Airteagal sin as an éadáil earraí laistigh den Chomhphobal dá dtagraítear sa chéad mhír.

Chun críche Airteagail 16, 18, 26, 185 go 189 agus 192, meastar gurb ionann an díolúine sin dá dtagraítear sa chéad mhír agus feidhmiú cirt iomláin asbhainte CBL a bheadh dlite mura mbeadh an díolúine sin infheidhme.

Airteagal 369xj

An duine inchánach a bhfuil úsáid á baint aige as an scéim speisialta seo, i leith a ghníomhaíochtaí inchánacha a chumhdaítear leis an scéim speisialta seo, ní fhéadfaidh sé an CBL in-asbhainte de bhun Airteagal 168 den Treoir seo sna Ballstáit a ndéantar na hearraí a sheoladh nó a iompar chucu nó uathu a fhógairt sa tuairisceán CBL den scéim sin. D'ainneoin Airteagal 1, pointe (1), de Threoir 86/560/CEE, Airteagal 2, pointe (1), Airteagal 3, agus Airteagal 8(1), pointe (e), de Threoir 2008/9/CE, déanfar an duine inchánach i gceist a aisíoc i gcomhréir leis na Treoracha sin. Ní bheidh feidhm ag Airteagail 2(2) ná 4(2) de Threoir 86/560/CEE maidir le haisíocaíochtaí a bhaineann le hearraí agus seirbhísí a úsáidtear chun críocha aistriúcháin earraí dílse a chumhdaítear faoin scéim speisialta seo.

I gcás ina gceanglaítear ar an duine inchánach a bhfuil úsáid á baint aige as an scéim speisialta seo bheith cláraithe i mBallstát le haghaidh gníomhaíochtaí nach gcumhdaítear leis an scéim speisialta seo, déanfaidh sé CBL a asbhaint, ar CBL é a thabhaítear sa Bhallstát sin i leith earraí nó seirbhísí arna soláthar dó sa Bhallstát sin, sa tuairisceán CBL atá le cur isteach i gcomhréir le hAirteagal 250.

Airteagal 369xk

1. Déanfaidh an duine inchánach a bhfuil úsáid á baint aige nó aici as an scéim speisialta seo taifid ar na haistrithe earraí dílse a chumhdaítear leis an scéim speisialta seo a choimeád. Ní mór do na taifid sin a bheith mionsonraithe a dhóthain lena chur ar chumas údaráis chánach na mBallstát a ndearnadh earraí a sheoladh nó a iompar chucu a fhíorú go bhfuil an tuairisceán CBL ceart.

2. Cuirfear na taifid dá dtagraítear i mír 1 ar fáil go leictreonach don Bhallstát a ndearnadh na hearraí a sheoladh nó a iompar uaidh agus chuige agus don Bhallstát aitheantais arna iarraidh sin.

Coimeádfar na taifid sin ar feadh tréimhse 10 mbliana ón 31 Nollaig sa bhliain ar lena linn a rinneadh an t-aistriú earraí dílse.?

Airteagal 3

Leasuithe ar Threoir 2006/112/CE le héifeacht ón 1 Iúil 2029

Leasaítear Treoir 2006/112/CE mar a leanas:

- (1) in Airteagal 243, scriostar mír 3;
- (2) in Airteagal 262, scriostar mír 2;

Airteagal 4

Leasuithe ar Threoir 2006/112/CE le héifeacht ón 1 Iúil 2030

Leasaítear Treoir 2006/112/CE mar a leanas:

(1) in Airteagal 42, cuirtear an méid seo a leanas in ionad phointe (b):

‘(b) chomhlíon an duine a fhaigheann na hearraí leis na hoibleagáidí atá leagtha síos i Roinn 1 de Chaibidil 6 de Theideal XI a bhaineann le haistriú sonraí faoi éadail earraí laistigh den Chomhphobal.’;

(2) in Airteagal 138, cuirtear an méid seo a leanas in ionad mhír 1a:

‘1a. Ní bheidh feidhm ag an díolúine dá ndéantar foráil i mír 1 den Airteagal seo i gcás nár chomhlíon an soláthróir an oibleagáid dá ndéantar foráil in Airteagail 262 agus 263 chun na sonraí faoi idirbhearta laistigh den Chomhphobal a chur in iúl, ná i gcás nach bhfuil an fhaisnéis cheart sna sonraí sin a aistríodh maidir leis an soláthar mar a éilítear faoi Airteagal 264, ach amháin i gcás ina bhféadfaidh an soláthróir údar cuí a thabhairt le haon easnamh chun sástacht na n-údarás inniúil.’;

(2a) in Airteagal 168, cuirtear an mhír seo a leanas leis:

‘I gcás ina bhfuil an t-idirbheart faoi réir na n-oibleagáidí tuairiscithe a leagtar síos in Airteagal 271a(1), féadfaidh na Ballstáit, i gcomhréir leis na coinníollacha arna leagan síos acu, a fhoráil nach mbeidh an custaiméir i dteideal an CBL atá dlite nó íoctha a asbhaint nó a aiséileamh ach amháin má tá ríomhshonrasc a eisíodh de réir na gceanglas a leagtar síos in Airteagal 218, mír 3 ina sheilbh aige.’;

(2b) Cuirtear an méid seo a leanas in ionad Airteagal 217:

‘Airteagal 217

Chun críocha na Treorach seo, is éard a chiallaíonn ‘ríomhshonrasc’ ná sonrasc ina bhfuil an fhaisnéis a éilítear leis an Treoir seo, agus atá, ar a laghad a mhéid a bhaineann leis na sonraí a áirítear in Airteagail 262 agus 271b, eisithe, tarchurtha agus faighte i bhformáid leictreonach struchtúrtha lena bhféadtar é a phróiseáil go huathoibrithe agus go leictreonach.

(3) Cuirtear an méid seo a leanas in ionad Airteagal 218:

‘Airteagal 218

1. Ríomhshonraisc, doiciméid nó teachtaireachtaí ar pháipéar nó i bhformáidí leictreonacha nach ríomhshonraisc iad, comhlíonfaidh siad na coinníollacha a leagtar síos sa chaibidil seo le go nglacfar leo mar shonraisc.
2. Chun críocha na Treorach seo, is mar ríomhshonraisc a eiseofar sonraisc. Féadfaidh Ballstáit, áfach, glacadh le doiciméid nó teachtaireachtaí ar pháipéar nó i bhformáidí leictreonacha nach ríomhshonraisc iad mar shonraisc le haghaidh idirbheart nach bhfuil faoi réir na n-oibleagáidí tuairiscithe a leagtar síos i dTeideal XI, Caibidil 6.
3. Comhlíonfaidh ríomhshonraisc an caighdeán Eorpach i ndáil le ríomhshonrascadh agus liosta a chomhréireanna de bhun Threoir 2014/55/AE ó Pharlaimint na hEorpa agus ón gComhairle*. Féadfaidh na Ballstáit úsáid caighdeán eile a cheadú le haghaidh ríomhshonraisc a bhaineann le soláthairtí earraí agus seirbhísí laistigh dá gcríoch, cé is moite díobh sin dá dtagraítear in Airteagal 262.

4. Maidir le ríomhshonraisc arna n-eisiúint ag daoine inchánacha, déanfaidh na Ballstáit na bearta is gá chun an méid a leanas a áirithiú:

- go n-áireofar an fhaisnéis a cheanglaítear leis an Treoir seo;
- go mbeidh na caighdeáin theicniúla is gá maidir le ríomhshonrascadh dá dtagraítear i mír 3 á gcomhlíonadh.

5. Glacfaidh na Ballstáit leis go bhfuil na bearta a leagtar síos i mír 4 á gcomhlíonadh ag an duine inchánach a bhfuil an sonrasc á eisiúint aige nó ag tríú páirtí atá ag gníomhú ina ainm agus dá chuntas.

Féadfaidh na Ballstáit úsáid tairsí poiblí a cheadú freisin, a mhéid atá sí ar fáil.

*Treoir 2014/55/AE ó Pharlaimint na hEorpa agus ón gComhairle an 16 Aibreán 2014 maidir le ríomhshonrascadh i gcás an tsoláthair phoiblí (IO L 133, 6.5.2014, lch. 1).’;

(4) in Airteagal 222, cuirtear an méid seo a leanas in ionad na chéad mhíre:

‘Maidir le soláthairtí earraí a dhéantar i gcomhréir leis na coinníollacha a shonraítear in Airteagal 138 nó maidir le soláthairtí earraí nó seirbhísí dá bhfuil CBL iníoctha ag an gcustaiméir de bhun Airteagail 194, 195, 196 agus 197, eiseofar sonrasc tráth nach déanaí ná 10 lá i ndiaidh an teagmhais inmhuirir.

I gcás ina ndéantar íocaíocht ar cuntas sula gcuirtear soláthairtí earraí nó seirbhísí dá bhfuil CBL iníoctha ag an gcustaiméir de bhun Airteagail 194, 195, 196 agus 197 i gcrích, eiseofar sonrasc tráth nach déanaí ná 10 lá tar éis an íocaíocht ar cuntas a fháil.’;

- (5) Leasaítear Airteagal 223 mar a leanas:

‘Airteagal 223

Ceadóidh Ballstáit do dhaoine inchánacha sonraisc achoimre a eisiúint ina mionsonraítear roinnt soláthairtí earraí nó seirbhísí ar leithligh ar an gcuntar go mbeidh CBL ar na soláthairtí a luaitear sa sonrasc achomair inmhuirearaithe le linn na míosa féilire céanna.

Maidir le soláthairtí earraí agus seirbhísí dá dtagraítear in Airteagal 222, eiseofar sonraisc achoimre tráth nach déanaí ná 10 lá tar éis dheireadh na míosa féilire dá dtagraíonn an sonrasc achomair.

Féadfaidh na Ballstáit a eisiamh go bhféadfaí sonraisc achomair a eisiúint in earnálacha áirithe atá íogair ó thaobh calaoise de. Cuirfidh na Ballstáit an Coiste um CBL ar an eolas maidir le heisiaimh atá curtha chun feidhme acu.’;

- (6) Leasaítear Airteagal 226 mar a leanas:

- (a) cuirtear an méid seo a leanas in ionad pointe (11a):

‘(11a) i gcás arb é an custaiméir atá dlite CBL a íoc, an tagairt ‘aistriú táillí’, agus i gcás soláthar earraí arb é an faighteoir atá dlite an cháin a íoc ina leith de bhun Airteagal 197, an tagairt ‘idirbheart triantánach’ lena chois;’;

(b) cuirtear isteach na pointí (16) agus (17) seo a leanas:

‘(16) i gcás sonrasc ceartaitheach dá dtagraítear in Airteagal 219, an uimhir sheicheamhach lena sainaitheann an sonrasc ceartaithe, dá dtagraítear i bpointe (2);

(17) uimhir/uimhreacha cuntais bainc nó uimhir/uimhreacha chuntais fhíorúla an tsoláthróra nó aon aitheantóir/aitheantóirí eile lena sainaitheann gan débhrí cuntas/cuntais an tsoláthróra, ar féidir le faighteoirí an tsonraisc an sonrasc sin a íoc leo.’;

(6a) Cuirtear an méid seo a leanas in ionad Airteagal 232:

‘Airteagal 232

Eisiúint ríomhshonraisc, a chomhlíonann an caighdeán Eorpach i ndáil le ríomhshonrascadh agus liosta a chomhréireanna de bhun Threoir 2014/55/AE, chuig duine inchánach nó chuig duine dlítheanach neamh-inchánach, ní bheidh sí faoi réir a glactha ag an bhfaighteoir. Féadfaidh na Ballstáit áfach, sonraisc a chomhlíonann an caighdeán a chur faoi réir a nglactha ag an bhfaighteoir le haghaidh idirbhearta nach bhfuil faoi réir na n-oibleagáidí tuairiscithe a leagtar síos i dTeideal XI, Caibidil 6, i gcás inar bhain an Ballstát sin úsáid as an rogha i mír 2 d’Airteagal 218.

Eisiúint ríomhshonrais, a chomhlíonann caighdeán eile, nó eisiúint sonrasc i bhformáidí leictreonacha nach ríomhshonrais iad, chuig duine inchánach nó chuig duine dlítheanach neamh-inchánach, beidh sí faoi réir a glactha ag an bhfaighteoir. Mar sin féin, féadfaidh Ballstáit a bhain úsáid as an rogha i mír 3 d’Airteagal 218 foráil a dhéanamh nach mbeidh ríomhshonrais a úsáideann caighdeáin eile faoi réir a nglactha ag an bhfaighteoir atá bunaithe laistigh dá gcríoch.

Féadfaidh Ballstáit a bhain úsáid as an rogha in Airteagal 221, mír 1, eisiúint ríomhshonrasc nó sonrasc i bhformáidí leictreonacha nach ríomhshonrais iad a chur faoi réir a nglactha ag an gcustaiméir.’;

(6b) in Airteagal 233(2), leasaítear an fhoclaíocht réamhráiteach mar a leanas:

‘Seachas trí bhíthin an chineáil rialuithe gnó a thuairiscítear i mír 1, is samplaí iad seo a leanas de theicneolaíochtaí lena n-áirithítear barántúlacht thionscnaimh agus sláine inneachar ríomhshonrais nó doiciméad nó teachtaireachtaí i bhformáidí leictreonacha nach ríomhshonrais iad:’;

(6c) Cuirtear an méid seo a leanas in ionad Airteagal 235:

‘Airteagal 235

Féadfaidh na Ballstáit coinníollacha sonracha a leagan síos maidir le ríomhshonrais nó doiciméid nó teachtaireachtaí leictreonacha i bhformáidí leictreonacha nach ríomhshonrais iad arna n-eisiúint i leith earraí nó seirbhísí arna soláthar ina gcríoch ó thír nach ann d’ionstraim dlí ina leith a bhaineann le cúnaimh frithpháirteach atá comhchosúil ó thaobh raon feidhme de leis an raon feidhme dá bhforáiltear i dTreoir 2010/24/AE agus i Rialachán (CE) Uimh. 1798/2003.’;

- (6d) Cuirtear an méid seo a leanas in ionad Airteagal 236:

‘Airteagal 236

I gcás ina ndéantar bairceanna ina bhfuil ríomhshonraisc éagsúla nó doiciméid nó teachtaireachtaí éagsúla i bhformáidí leictreonacha nach ríomhshonraisc iad a sheoladh chuig an bhfaighteoir céanna nó a chur ar fáil don fhaighteoir céanna, ní fhéadfar na sonraí is coiteann do na sonraisc aonair a lua ach an t-aon uair amháin i gcás, le haghaidh gach sonraisc, ina bhfuil an fhaisnéis go léir inrochtana.’;

- (7) cuirtear an méid seo a leanas in ionad an cheannteidil de Chaibidil 6 i dTeideal XI:

‘CAIBIDIL 6

Ceanglais maidir le tuairisciú digiteach’;

- (8) i dTeideal XI, Caibidil 6, cuirtear isteach an ceannteideal seo a leanas ar Fhoroinn 1:

‘Roinn 1

Ceanglais maidir le tuairisciú digiteach le haghaidh soláthairtí trasteorann earraí agus seirbhísí laistigh den Chomhphobal a dhéantar idir daoine inchánacha’;

- (9) Cuirtear an méid seo a leanas in ionad Airteagal 262:

'Airteagal 262

1. Déanfaidh gach duine inchánach a shaináithnítear chun críocha CBL na sonraí dá dtagraítear in Airteagal 264 a thíolacadh maidir leis an méid seo a leanas:

- (a) soláthairtí agus aistriútha earraí a dhéantar i gcomhréir le hAirteagal 138(1) agus le pointe (c) d'Airteagal 138(2);
- (b) éadálacha earraí laistigh den Chomhphobal, a dhéantar i gcomhréir le hAirteagal 20 agus idirbhearta a gcaitear leo mar sin de bhun Airteagal 21 nó Airteagal 22;
- (c) soláthairtí earraí agus seirbhísí, cé is moite d'earraí nó seirbhísí atá díolmhaithe ó CBL sa Bhallstát ina bhfuil an t-idirbheart inchánach, a bhfuil an faighteoir dlite an cháin a íoc ina leith de bhun Airteagal 194 a mhéid a shaináithnítear an custaiméir chun críocha CBL, Airteagail 195, 196 agus 197; agus
- (d) éadail earraí agus seirbhísí, cé is moite d'earraí nó seirbhísí atá díolmhaithe ó CBL sa Bhallstát ina bhfuil an t-idirbheart inchánach, a bhfuil an duine sin dlite an cháin a íoc ina leith de bhun Airteagal 194 a mhéid a shaináithnítear an custaiméir chun críocha CBL, Airteagail 195, 196, 197 nó 204.

Féadfaidh na Ballstáit foráil a dhéanamh nach gcuirfidh daoine inchánacha a shaináithnítear chun críocha CBL isteach na sonraí dá dtagraítear in Airteagal 264 maidir leis na hidirbhearta dá dtagraítear i bpointí (b) agus (d) den chéad fhomhír. Tabharfaidh na Ballstáit a ghlacfaidh an rogha sin fógra don Choimisiún, a chuirfidh na Ballstáit eile ar an eolas faoin méid seo a leanas:

- (a) glacadh an bhirt sin, sula dtiocfaidh sé i bhfeidhm;
- (b) an dáta nach mbeidh an beart sin á chur i bhfeidhm a thuilleadh, roimh an dáta sin.

2. Cuirfear an fhaisnéis dá dtagraítear i mír 1 faoi bhráid an Bhallstáit a d'eisigh an uimhir aitheantais CBL don duine inchánach, uimhir a d'úsáid sé don idirbheart dá dtagraíonn an fhaisnéis.

3. De mhaolú ar phointí (a) agus (b) de mhír 1, ní chuirfidh daoine inchánacha atá cláraithe faoin scéim speisialta a leagtar síos i Roinn 5, Caibidil 6 de Theideal XII faisnéis isteach maidir le haistrithe earraí dílse agus maidir leis na hidirbhearta a gcaitear leo mar éadálacha laistigh den Chomhphobal de bhun Airteagail 21 nó 22 a bhaineann leis na hearraí céanna.

(10) Cuirtear an méid seo a leanas in ionad Airteagal 263:

'Airteagal 263

1. Na daoine inchánacha a bhfuil d'oibleagáid orthu sonrasc a eisiúint a bhaineann leis na hidirbhearta dá dtagraítear i bpointí (a) agus (c) d'Airteagal 262(1), déanfaidh siad na sonraí dá dtagraítear in Airteagal 262(1) a tharchur le haghaidh gach idirbhirt aonair, tráth a eiseofar an sonrasc nó ar cheart é a bheith eisithe.

I gcás ina n-eisíonn faighteoir na n-earraí nó faighteoir na seirbhísí an sonrasc thar ceann an duine inchánach a bhfuil d'oibleagáid air sonrasc a eisiúint, tarchuirfear na sonraí dá dtagraítear in Airteagal 262(1) le haghaidh gach idirbhirt aonair tráth nach déanaí ná 5 lá tar éis an sonrasc a eisiúint nó tar éis an dáta ba cheart é a bheith eisithe.

2. Na daoine inchánacha a gcaithfear sonrasc a eisiúint chucu a bhaineann leis na hidirbhearta dá dtagraítear i bpointí (b) agus (d) d'Airteagal 262(1), déanfaidh siad na sonraí dá dtagraítear in Airteagal 262(1) a tharchur le haghaidh gach idirbhirt aonair, tráth nach déanaí ná 5 lá ó gheofar an sonrasc. Féadfaidh na Ballstáit foráil a dhéanamh maidir le tarchur sonraí faoi na hidirbhearta sin i gcás nach mbeidh an sonrasc faighte in am trátha ag an duine a gcaithfear an sonrasc a eisiúint chuige.

3. Is é an duine inchánach nó tríú páirtí thar ceann an duine inchánach sin a tharchuirfidh na sonraí dá dtagraítear i míreanna 1 agus 2. Déanfaidh Ballstát foráil maidir leis na modhanna leictreonacha chun na sonraí sin a chur faoi bhráid an Choimisiúin.

Ceadóidh Ballstáit tarchur na sonraí sin a chomhlíonann an caighdeán Eorpach i ndáil le ríomhshonrascadh agus liosta a chomhréireanna de bhun Threoir 2014/55/AE ó Pharlaimint na hEorpa agus ón gComhairle.

4. Cinnfear an teachtaireacht leictreonach choiteann chun na sonraí dá dtagraítear i míreanna 1 agus 2 a chur ar fáil i gcomhréir leis an nós imeachta dá ndéantar foráil in Airteagal 58(2) de Rialachán (AE) Uimh. 904/2010.’;

(11) Cuirtear an méid seo a leanas in ionad Airteagal 264:

‘Airteagal 264

Beidh an méid uile seo a leanas sna sonraí a tharchuirtear i gcomhréir le hAirteagal 263:

- (a) i ndáil le soláthairtí earraí a dhéantar i gcomhréir le hAirteagal 138(1) agus soláthairtí earraí agus seirbhísí, cé is moite d’earraí nó seirbhísí atá díolmhaithe ó CBL sa Bhallstát ina bhfuil an t-idirbheart inchánach, arb é an faighteoir atá dlite an cháin a íoc ina leith de bhun Airteagail 194, 195, 196 agus 197, an fhaisnéis dá dtagraítear in Airteagal 226, pointí (1) go (4), (6), (7), (8), (11), (16), (17), agus (11a) más amhlaidh atá;
- (b) maidir le haistrithe a dhéantar i gcomhréir le hAirteagal 138(2), pointe (c), an fhaisnéis dá dtagraítear in Airteagal 226, pointí (1) go (4), (6), (7), (8), (11) agus (16);

- (c) i ndáil le héadáil earraí laistigh den Chomhphobal a dhéantar i gcomhréir le hAirteagal 20 agus le hidirbhearta a gcaitear mar sin leo de bhun Airteagal 22, an fhaisnéis dá dtagraítear in Airteagal 226, pointí (1) go (4), (6), (7), (8), (9), (10), (11), (16) agus (17);
- (d) i ndáil le hidirbhearta a gcaitear leo mar éadáil earraí laistigh den Chomhphobal de bhun Airteagal 21, an fhaisnéis dá dtagraítear in Airteagal 226, pointí (1) go (4), (6), (7), (8), (9), (10), (11) agus (16);
- (e) i ndáil le héadáil earraí agus seirbhísí, cé is moite d'earraí nó seirbhísí atá díolmhaithe ó CBL sa Bhallstát ina bhfuil an t-idirbheart inchánach, arb é an faighteoir atá dlite an cháin a íoc ina leith de bhun Airteagail 194, 195, 196, 197 agus 204, an fhaisnéis dá dtagraítear in Airteagal 226, pointí (1) go (4), (6), (7), (8), (9), (10), (16), (17), agus (15) más amhlaidh atá.?’;

(12) [scriosta]

(13) [scriosta]

(14) [scriosta]

(15) [scriosta]

- (16) scriostar Airteagail 265, 266, 267, 268, 269, 270 agus 271;
- (17) i dTeideal XI, Caibidil 6, cuirtear isteach an Roinn 2 seo a leanas:

‘Roinn 2

Ceanglais maidir le tuairisciú digiteach le haghaidh féinsoláthairtí agus soláthairtí earraí agus seirbhísí a dhéantar idir daoine inchánacha laistigh de chríoch Bhallstáit

Airteagal 271a

1. Féadfaidh Ballstáit a cheangal, maidir le daoine inchánacha atá bunaithe nó a sainaitníodh chun críocha CBL ina gcríoch, go seolfaidh siad go leictreonach chuig a n-údarás cánach sonraí faoi na soláthairtí earraí agus seirbhísí, cé is moite díobh sin dá dtagraítear in Airteagal 262, a dhéantar laistigh dá gcríoch chucu féin nó chuig daoine inchánacha eile.
2. Féadfaidh Ballstáit a cheangal, maidir le daoine inchánacha atá bunaithe nó a sainaitníodh chun críocha CBL ina gcríoch, go seolfaidh siad go leictreonach chuig a n-údarás cánach sonraí faoi na soláthairtí earraí agus seirbhísí, cé is moite díobh sin dá dtagraítear in Airteagal 262, a dhéanann siad féin, laistigh dá gcríoch, chucu féin nó a dhéanann daoine inchánacha eile chucu.

Airteagal 271b

1. I gcás ina gceanglaíonn Ballstát na sonraí a sheoladh de bhun Airteagal 271a(1), tarchuirfidh an duine inchánach a bhfuil d'oibleagáid air an sonrasc a eisiúint, nó tríú páirtí thar ceann an duine inchánach sin, tarchuirfidh sé na sonraí sin maidir le gach idirbheart aonair tráth a eiseofar an sonrasc nó ar cheart é a bheith eisithe.

I gcás ina n-eisíonn faighteoir na n-earraí nó faighteoir na seirbhísí an sonrasc thar ceann an duine inchánach a bhfuil d'oibleagáid air sonrasc a eisiúint, tarchuirfear na sonraí dá dtagraítear in Airteagal 271a(1) le haghaidh gach idirbhirt aonair tráth nach déanaí ná 5 lá tar éis an sonrasc a eisiúint nó tar éis an dáta ba cheart é a bheith eisithe.

2. I gcás ina gceanglaíonn Ballstát na sonraí a sheoladh de bhun Airteagal 271a(2), tarchuirfidh an duine inchánach ar eisíodh sonrasc chuige, nó tríú páirtí thar ceann an duine inchánach sin, tarchuirfidh sé na sonraí sin maidir le gach idirbheart aonair tráth nach déanaí ná 5 lá ó gheofar an sonrasc. Féadfaidh na Ballstáit foráil a dhéanamh maidir le tarchur sonraí faoi na hidirbhearta sin i gcás nach mbeidh an sonrasc faighte in am trátha ag an duine a gcaithfear an sonrasc a eisiúint chuige.

3. Ceadóidh na Ballstáit tarchur sonraí ó ríomhshonraisc a chomhlíonann an caighdeán Eorpach i ndáil le ríomhshonrascadh agus liosta a chomhréireanna de bhun Threoir 2014/55/AE.

Féadfaidh na Ballstáit tarchur sonraí ó ríomhshonraisc a cheadú agus úsáid á baint as formáidí eile sonraí seachas an caighdeán Eorpach i ndáil le ríomhshonrascadh agus liosta a chomhréireanna de bhun Threoir 2014/55/AE ar choinníoll go n-áirithítear leis na formáidí eile sonraí idir-inoibritheacht leis an gcaighdeán Eorpach sin maidir le ríomhshonrascadh.

4. Na Ballstáit a éilfonn tarchur na sonraí de bhun Airteagal 271a, féadfaidh siad raon feidhme na hoibleagáide sin a theorannú do chatagóirí áirithe daoine inchánacha, nó do chineálacha áirithe idirbheart. Cinnfidh siad freisin na sonraí is gá a tharchur.

Airteagal 271c

Faoin 31 Márta 2033 ar a dhéanaí, déanfaidh an Coimisiún, bunaithe ar an bhfaisnéis arna cur ar fáil ag Ballstáit, tuarascáil eatramhach mheastóireachta a chur faoi bhráid na Comhairle faoi fheidhmiú an ríomhshonrasctha a leagtar amach i gCaibidil 3 agus faoi fheidhmiú na gceanglas tuairiscithe dhigitigh laistigh den Aontas agus intíre a leagtar amach sa Chaibidil seo. I ndáil leis an tuarascáil sin, déanfaidh an Coimisiún:

- measúnú ar éifeachtaí na mbeart ar éifeachtacht bhailiú CBL agus ar laghdú na bearna CBL, ar líon na rialuithe arna ndéanamh ag an riarachán cánach agus ar laghdú an ualaigh riaracháin agus ar choigilteas costais do dhaoine inchánacha;
- measúnú ar éifeachtaí na rogha a thairgtear do na Ballstáit in Airteagal 262(1), an dara fómhír, maidir le calaois CBL i mBallstáit eile agus maidir le feidhmiú an VIES lárnaigh;
- measúnú ar na saincheistean teicniúla a eascraíonn as cur chun feidhme na mbeart mar shampla earráidí, moilleanna agus easnaimh a bhaineann le tarchur na sonrasc agus na sonraí;
- na bearta agus na seirbhísí arna gcur i bhfeidhm ag na Ballstáit agus a cuireadh ar fáil do cháiniócóirí chun a n-ualach riaracháin a laghdú a mheas;

- a mharana ar fhorbairtí nua teicneolaíochta a d'fhéadfadh a bheith ann i réimsí an ríomhshonrasctha agus an tuairiscithe dhigitigh;
- measúnú dá réir sin ar an ngá le bearta breise agus, má mheastar gur ghá, déanfaidh sé togra reachtach iomchuí le haghaidh na mbeart sin.

(18) Cuirtear an méid seo a leanas in ionad Airteagal 273:

'Airteagal 273

Féadfaidh Ballstáit oibleagáidí eile a fhorchur, ar oibleagáidí iad a mheasann siad a mbeidh gá leo chun bailiúchán ceart CBL a áirithiú agus chun imghabháil a sheachaint, faoi réir an cheanglais maidir le cóir chomhionann amhail idir idirbhearta intíre agus idirbhearta a dhéantar idir Ballstáit ag daoine inchánacha agus ar choinníoll nach n-eascaíonn foirmiúlachtaí a bhaineann le trasnú teorainneacha as na hoibleagáidí sin maidir le trádáil idir Ballstáit.

Ní fhéadtar brath ar an rogha faoin gcéad mhír chun oibleagáidí breise maidir le sonrascadh a fhorchur os cionn na n-oibleagáidí atá leagtha síos i gCaibidil 3, ná chun oibleagáid nua ginearálta tuairiscithe breise, bunaithe ar idirbhearta, a chur chun feidhme le haghaidh soláthairtí nó éadálacha earraí agus seirbhísí idir daoine inchánacha arna sainaithint chun críocha CBL laistigh den Aontas, os cionn na n-oibleagáidí atá leagtha síos i dTeideal XI, Caibidil 6. Mar sin féin, féadfaidh na Ballstáit a cheangal ar dhaoine inchánacha sonraí a stóráil maidir lena n-idirbhearta chun na sonraí sin a thuairisciú de réir mar is gá chun tuairisceán CBL a ullmhú nó chun críoch iniúchóireachta. Na Ballstáit a raibh oibleagáid tuairiscithe ghinearálta bunaithe ar idirbhearta orthu, an 1 Eanáir 2024, le haghaidh soláthairtí earraí agus seirbhísí cé is moite díobh siúd dá dtagraítear in Airteagal 262, féadfaidh siad na hoibleagáidí tuairiscithe sin a choinneáil ar bun go dtí go gcuirfidh siad córas tuairiscithe digiteach agus fíor-ama chun feidhme maidir le soláthairtí earraí agus seirbhísí a chomhlíonann na ceanglais a leagtar síos i dTeideal XI, Caibidil 6, Roinn 2.

Na Ballstáit a raibh oibleagáid tuairiscithe ghinearálta bunaithe ar idirbhearta orthu, an 1 Eanáir 2024, le haghaidh éadálacha earraí agus seirbhísí cé is moite díobh siúd dá dtagraítear in Airteagal 262, féadfaidh siad na hoibleagáidí tuairiscithe sin a choinneáil ar bun go dtí go gcuirfidh siad córas tuairiscithe digiteach agus fíor-ama chun feidhme maidir le héadálacha earraí agus seirbhísí a chomhlíonann na ceanglais a leagtar síos i dTeideal XI, Caibidil 6, Roinn 2.

Féadfaidh na Ballstáit an ceanglas ar dhaoine inchánacha a choinneáil sonraí a stóráil maidir lena n-idirbhearta chun na sonraí sin a thuairisciú de réir mar is gá chun tuairisceán CBL a ullmhú nó chun críoch iniúchóireachta.

Féadfaidh na Ballstáit oibleagáidí tuairiscithe a fhorchur maidir le hidirbhearta cé is moite de na hidirbhearta sin a chumhdaítear leis na hoibleagáidí tuairiscithe a leagtar síos i dTeideal XI, Caibidil 6.’

Airteagal 5

Trasuí

0. Féadfaidh na Ballstáit na dlíthe, na rialacháin agus na forálacha riaracháin maidir le hAirteagal 0, míreanna (1) agus (2), den Treoir seo a chur i bhfeidhm ón [IO: cuir isteach dáta theacht i bhfeidhm na Treorach seo]. Cuirfidh siad an Coimisiún ar an eolas faoi sin láithreach.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an bealach a ndéanfar an tagairt sin.

1. Glacfaidh agus foilseoidh na Ballstáit, faoin 31 Nollaig 2026, pé dlíthe, rialacháin agus forálacha riaracháin is gá chun Airteagal 1 den Treoir seo a chomhlíonadh. Cuirfidh siad an Coimisiún ar an eolas faoin méid sin láithreach.

Cuirfidh siad na forálacha sin i bhfeidhm ón 1 Eanáir 2027.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an bealach a ndéanfar an tagairt sin.

2. Glacfaidh agus foilseoidh na Ballstáit, faoin 30 Meitheamh 2028, pé dlíthe, rialacháin agus forálacha riaracháin is gá chun Airteagal 2 den Treoir seo a chomhlíonadh.

Cuirfidh siad na forálacha sin i bhfeidhm ón 1 Iúil 2028.

De mhaolú ar an dara fomhír, feidhmeoidh na Ballstáit na forálacha is gá chun Airteagal 2, pointe (3) den Treoir seo a chomhlíonadh ar a luaithe ón 1 Iúil 2028 agus ar a dhéanaí ón 1 Eanáir 2030.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an bealach a ndéanfar an tagairt sin.

3. Glacfaidh agus foilseoidh na Ballstáit, faoin 30 Meitheamh 2029, pé dlíthe, rialacháin agus forálacha riaracháin is gá chun Airteagal 3 den Treoir seo a chomhlíonadh.

Cuirfidh siad na forálacha sin i bhfeidhm ón 1 Iúil 2029.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an bealach a ndéanfar an tagairt sin.

4. Glacfaidh agus foilseoidh na Ballstáit, faoin 30 Meitheamh 2030, pé dlíthe, rialacháin agus forálacha riaracháin is gá chun Airteagal 4 den Treoir seo a chomhlíonadh.

Cuirfidh siad na forálacha sin i bhfeidhm ón 1 Iúil 2030.

Mar sin féin, na Ballstáit a bhfuil oibleagáid intíre maidir le tuairisciú digiteach fíor-ama bunaithe ar idirbhearta curtha i bhfeidhm acu an 1 Eanáir 2024 nó ar deonaíodh údarú dóibh ar bhonn Airteagal 395 roimh an 1 Eanáir 2024 lena gceadaítear dóibh an oibleagáid sin a chur i bhfeidhm nó, i gcás nach raibh gá leis an údarú sin, a ghlac reachtaíocht náisiúnta roimh an 1 Eanáir 2024 lena ndéantar foráil do thabhairt isteach na hoibleagáide intíre sin maidir tuairisciú digiteach fíor-ama bunaithe ar idirbhearta, cuirfidh siad i bhfeidhm na forálacha in Airteagal 4(3) a bhaineann le hAirteagal 218 agus in Airteagal 4(17) a bhaineann le hAirteagail 271a agus 271b faoi Eanáir 2035, a mhéid a bhaineann le ríomhshonrascadh agus tuairisciú intíre. I gcás ina léirítear sa mheasúnú dá dtagraítear in Airteagal 271c go bhfuil easnaimh ann, déanfaidh an Coimisiún measúnú ar an ngá atá le bearta breise agus, más gá, déanfaidh sé moladh iomchuí d'fhonn an spriocdháta sin a chur siar go dtí go dtabharfar aghaidh ar na heasnaimh sin.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an bealach a ndéanfar an tagairt sin.

5. Déanfaidh na Ballstáit téacs phríomhfhorálacha an dlí náisiúnta a ghlacfaidh siad sa réimse a chumhdaítear leis an Treoir seo a chur in iúl don Choimisiún.

Airteagal 6

Teacht i bhfeidhm

Tiocfaidh an Treoir seo i bhfeidhm an fichiú lá tar éis lá a foilsithe in *Iris Oifigiúil an Aontais Eorpaigh*.

Airteagal 7

Seolaithe

Is chuig na Ballstáit a dhírítear an Treoir seo.

Arna dhéanamh sa Bhruiséil,

Thar ceann na Comhairle

An tUachtarán
